

四庫全書

史部

欽定四庫全書

史部  
資治通鑑考異卷六  
七

詳校官修撰臣錢 榮

洗馬臣王坦修覆勘

總校官庶吉士臣張能照

校對官編修臣裴 謙

謄錄監生臣劉銓瑛

欽定四庫全書

資治通鑑考異卷六

宋司馬光撰

宋紀下

蒼梧王元徽二年五月壬午桂陽王休範反

宋書作壬子按長曆

北月辛未朔無壬子今從宋略

休範登臨滄觀以數十人自衛

張敬兒傳云左右數百人皆散走按休範左右

何敢徑往取之今從休範傳

陳靈寶送休範首棄之於水

南齊書云埋首道側宋略棄諸溝中今從宋書

杜黑驪攻新亭

宋書南齊書作墨蠡今從宋略

褚澄開東府門納南軍

宋書作撫軍典籤茅恬開東府納賊南齊書作車騎典籤茅恬

蓋皆謂褚澄傳耳今從宋略

六月休範使陳公昭遺沈攸之書攸之送之朝廷

宋略云桂

陽遺攸之書署曰沈丞相攸之斬其使今從宋書

癸卯毛惠連降

宋略作癸亥按下有戊申今從宋書

九月

後魏帝紀使將軍元蘭五將三萬騎及假東陽王丕為後繼伐蜀漢不言勝負列傳及宋書皆無之

今不取

司徒左長史蕭惠明

宋略作惠朗按魏朗不為司徒長史今從南史

四年六月魏馮太后鳩顯祖

元行沖後魏國典云太后伏壯士於禁中太上天入謁

遂崩按事若如此安得不彰而中外恬然不以為怪入孝文終不之知按後魏書及北史皆無殺事而天象志云獻文景崩實有鳩毒之禍今從之

順帝昇明元年端午太后賜蒼梧王毛扇

宋略作太妃賜今從宋書

六月蒼梧王殺杜幼文等

南史云孝武二十八子太宗殺其十六餘皆帝殺之按宋

書孝武諸子十人早卒二人為景和所殺餘皆太宗殺之無及蒼梧時者南史誤也

蕭道成族弟順之

齊高帝紀姚思廉梁書武帝紀自相國何至皇考二十餘世皆有名及官

位蓋史官附會今所不取

七月蒼梧王於臺岡賭跳

南史作戀岡今從宋書

蕭道成開承明門而入

齊高帝紀云衛尉丞顏靈寶窺見太祖乘馬在外竊謂親人曰

今若不開內領軍入天下會是亂耳按靈寶若語所親則須有知者豈得宿衛晏然不動今從宋後廢帝紀

十月氏楊文度遣弟文弘陷仇池

魏書本紀作楊黽氏傳作鼠皆避顯祖諱

也

李訢信用范攄弟瑛諫

魏典攄作剽瑛作璞今從後魏書

十二月魏軍至建安楊文弘棄城走

是年魏置閏在十一月宋之十二月

也

劉韞入直門下省

南齊書韞作愠今從宋書南史

王蘊帥部曲數百向石頭

宋書云齊王使蘊募人已得數百宋略云是夕徵其私衆

倏忽之間被甲數百莫知所從出按道成素已疑蘊必不使之募兵宋略近是也

戴僧靜殺袁粲父子

南史云僧靜奮刀直前欲斬之子最叫抱父乞先死兵士人人莫不

墮涕粲曰我不失忠臣汝不失孝子仍求筆作啟云臣義奉大宋策名兩畢今便歸魂墳隴永就山丘僧靜乃并斬之按時僧靜掩粲不備挺身直往安肯容粲作啟從容如此宋書皆無此等事今不取

閏月癸巳沈攸之至夏口

沈約齊紀十一月攸之遂謀為亂張敬兒遣使詣攸之慶

冬攸之呼使人於密室謂之曰奉皇太后令得索司徒劉丹楊諸人書呼我速下可令雍州知此意答敬兒書曰信口一二而封雞毛桃耳數物置函中敬兒賀冬使即乘驛白公十二日壬辰攸之遣孫同等先發十七日丁酉張敬兒使至十八日戊戌公率衆入鎮朝堂閏月十四日癸巳攸之至夏口按是歲宋歷閏十二月庚辰朔魏歷閏十一月庚戌朔然則冬至必在十一月晦攸之對敬兒賀冬使者猶隱祕豈可十二日已發兵東下乎又攸之若十二日已舉兵於江陵豈可六十餘日始至夏口又宋順帝紀十二月攸之反丁卯齊王入守朝堂丁卯乃十二月十八日也閏月癸巳攸之圍郢城攸之傳十一月反十二月十二日遣孫同等東下閏月十四日至夏口宋略十二月沈攸之作亂丁卯蕭道成入屯朝堂閏月癸巳攸之師及郢州南齊高帝紀十二月



攸之舉兵乙卯太祖入居朝堂諸書大抵略  
相符合惟齊紀不同蓋齊紀之誤今不取

二年正月沈攸之帥衆過江軍遂大散

宋略云甲辰攸之衆潰西逃乙

巳華容民斬其首按是月巳酉朔無甲辰乙巳

張敬兒至江陵

宋略云辛未敬兒克江陵按巳巳攸之以敬兒據城走死不容敬兒至辛未乃

入城也

## 齊紀

太祖建元元年五月賞佐命之功褚淵王儉等進爵增

戶南史崔祖思傳曰帝將加九錫內外皆贊成之祖思獨曰公以仁恕匡社稷執股肱之義君子愛人以德

不宜如此帝聞而非之曰祖思遠同荀令豈孤所望也由此不復處任職而禮見甚重垣崇祖受密旨參訪朝臣光祿大夫垣闕曰身受宋氏厚恩復蒙明公眷接進不敢同退不敢異冠軍將軍崔文仲與崇祖意同及帝受禪闕存故爵文仲崇祖皆封侯祖思加官而已按宋朝初議封帝為梁公祖思啟高帝曰識云金刀利刃齊刈之今宜稱齊寶應天命從之然則祖思安得誠節於宋今刪之

丙寅追尊考妣

南史在四月甲午今從齊書

十月初帝在淮陰欲附魏遣書結王玄邈房叔安勸玄

邈不答

南史云仍遣叔安奉表詣闕告之帝於路執之并求玄邈表叔安曰王將軍表上天子不上將

軍且僕之所言利國家不利將軍無所應問荀伯玉勸帝殺之帝曰物各為主無所責也按太祖時為邊將若

執叔安又不殺便應不復為  
宋臣齊書無此事今不取

十一月謝天蓋欲附魏韋珍引兵應接豫章王嶷遣蕭

惠朗助蕭景先討天蓋

齊蕭景先傳云天蓋與虜相構  
景先言於督府豫章王遣惠

朗助景先討天蓋黨與虜尋遣偽南部尚書類跋屯汝  
南洛州刺史昌黎王馮莎屯清丘景先嚴備待敵虜退  
魏韋珍傳云天蓋自署司州刺史規以內附事泄為道  
成將崔慧景所攻圍詔珍率在鎮士馬度淮援接時道  
成聞珍將至遣將苟元賓據淮逆拒珍珍腹背奮擊破  
之天蓋尋為左右所殺降於慧景珍乘勝馳進又破慧  
景擁降民七千餘戶內徙表置城陽剛陵義陽三郡以  
處之按魏將無類跋馮莎而慧景亦非討天蓋之將蓋  
時二國之史各出傳聞疑有訛  
謬今約取二史大槩而用之

帝遣王洪範約柔然寇魏

齊書作王洪範今從齊紀

二年正月以褚淵為司徒不受

齊書建元二年正月以淵為司徒十二月戊戌

以淵為司徒四年六月癸卯以司徒褚淵為司空八月癸卯司徒褚淵薨淵傳二年為司徒又固讓四年寢疾遜位改授司空及薨又曰司徒奄至薨逝蓋二年正月辭十二月受耳紀傳前後各不相顧

崔孝伯攻魏龍得侯等殺之

齊紀作龍渴侯今從齊書

北上黃蠻文勉德寇汶陽

齊紀作文施德今從齊書

五月王圖南崔慧景破李烏奴

魏書帝紀八月慧景寇武興今從慧景傳

十月徐州民桓標之為寇

魏書蘭陵民桓富蓋即標之也今從齊書

三年二月桓康拔魏樊諧城

齊紀作樊諧城今從齊書

魏議者欲盡殺道人

齊書魏虜傳咸陽王禧時尚幼太和九年始

封恐非也

己酉垣崇祖破魏師

齊書作丁卯按是月辛卯朔無丁卯今從齊紀

三月魏滅桓標之等掠三萬餘口歸平城

魏書云南征諸將擊破蕭

道成游擊將軍桓康於淮陽道成豫州刺史垣崇祖寇下蔡昌黎王馮熙擊破之假梁郡王嘉大破道成將俘獲三萬餘口送平城今從齊書齊紀亦以魏書參之

世祖永明二年十一月己未魏李彪來聘

齊紀十二月庚申虜使李

道固至今  
從魏帝紀

三年七月魏立梁彌承為宕昌王

齊書是歲八月丁巳以行宕昌王梁彌頡

為河涼二州刺史六年五月甲午以彌承為河涼二州刺史今從魏書

四年六月辛酉魏主如方山

魏帝紀是日幸方山七月戊戌又云幸方山皆不言

還宮蓋闕文耳

五年五月魏公孫邃張儵寇舞陰

齊書魏虜傳云偽安南將軍邃東公平南

將軍上谷公又攻舞陰魏書帝紀云詔南部尚書公孫文慶上谷公張伏于南討舞陰按公孫邃傳邃字文慶

與內都幢將上谷公張儵討蕭

順舞陰戌蓋伏于乃儵字也

十月高車阿伏至羅自立為王

魏書高車傳云在太和十一年蠕蠕在十六年

今從高車傳

八年四月魏陽平王頤

帝紀作熙又作頤今從本傳

八月河南王世子伏連籌

齊書作士子休留成今從魏書

蕭順之縊殺巴東王子響

齊書曰子響部下恐懼各逃散子響乃白服出降詔賜死

蓋蕭子顯為順之諱耳今從南史

十二月孔顗上言

齊紀作孔覲今從齊書南史

九年二月魏著作郎成淹遷侍郎

楊松玠談藪作朱淹又云自著作佐郎遷

著作郎今  
從魏書

八月乙巳魏帝問羣臣禘祫之義

禮志作太和十三年五月壬戌今從本紀

十年正月壬戌魏主詔承晉為水德

禮志太和十五年正月穆亮等言云

云按帝紀十六年正月壬戌詔定行次以水承金蓋志誤以六為五耳

七月吐谷渾世子賀虜頭

魏吐谷渾傳作賀魯頭今從帝紀

八月魏陽平王頥陸叡擊柔然

魏帝紀太和十一年八月壬申蠕蠕犯塞遣平

原王陸叡討之事具蠕蠕傳十六年八月乙未詔陽平王頥左僕射陸叡討蠕蠕按蠕蠕傳無十一年犯塞及

征討事唯有十六年八月頥叡出征事與紀合蓋十一年紀誤也



十一年三月遣呂文顯曹道剛收王與殷獻勸與錄取

與納之

南史與子彪議閉門拒命獻諫曰今開門白服接臺使不過贖官免爵耳彪堅執不開獻又請

遣典籤問道送啓與從之典籤出城為文顯所執獻曰忠不肯國勇不逃死勸與仰藥按獻與彪同誅今從齊書

王肅奔魏

南史與弟份自拘請罪帝宥之肅屢引魏人至邊帝謂份曰比有北信不份曰肅近忘墳

栢寧遠憶有臣按與以三月死帝以七月殂是冬肅始見魏主於鄴南史誤也齊書無此語

九月魏穆亮與支酉戰兵敗

齊書穆亮作繆老生今從魏書

高宗建武元年三月壬申魏主至平城

魏帝紀作閏月按魏閏二月齊

歷之三  
月也

四月庚辰魏罷西郊祭天

魏帝紀禮志北史紀皆云三月庚辰按長曆三月丙午朔

無庚辰魏閏二月齊閏四月魏三月乙亥朔齊曆之四月也故置于此焉

五月甲戌朔日食

齊魏書帝紀皆無此食今據齊書志南史紀

九月乙亥纂嚴

齊帝紀作乙未按是月壬申朔而止有癸未下有乙酉丁亥蓋癸未當作癸酉

乙未當作乙亥耳

何昌寓拒徐玄慶臨海王昭秀得還建康

南史明帝使裴叔業齋旨

詔昌寓令以便宜從事昌寓拒之曰臨海王未有失寧得從君單詔邪即時自有啟問須反更議叔業曰若爾

便是拒詔拒詔軍法行事耳荅曰能見殺者君也能拒詔者僕也叔業不敢逼而退昭秀由是得還都今從齊書

十二月魏盧淵韋珍攻赭陽齊書作盧陽烏韋靈智按陽烏淵小字靈智珍字也

二年四月房伯玉等敗魏薛真度於沙碣齊書魏虜傳真度敗在建

武元年下魏帝紀城陽王鸞以敗軍獲罪在太和十九年五月今從之

三年正月丁卯以楊崇祖為沙州刺史齊本紀作丁酉按長曆是月乙

丑朔無丁酉下有已巳當作丁卯

魏主改功臣姓魏初功臣姓皆複重奇僻孝文太和中變胡俗始改之魏收作魏書已盡用新

姓不用舊姓宋書索虜傳南齊書魏虜傳所稱者蓋其舊姓名耳今並從魏書以就簡易

魏薛宗起入郡姓

北史薛聰傳聰為羽林監帝曾與朝臣論海內姓地人物戲謂聰曰人謂

卿諸薛是蜀人定是蜀人不聰對曰臣遠祖廣德世事漢朝時人呼為漢臣九世祖永隨劉備入蜀時人呼為蜀臣今事陛下是虜非蜀也帝撫掌笑曰卿可自明非蜀何乃遂復苦朕聰因投戟而出帝曰薛監醉耳其見知如此今從元行冲後魏國典

閏月丙寅魏主廢太子恂

齊書魏虜傳云大馮有寵日夜讒恂魏書無之又魏帝紀

在十二月丙寅按長歷魏閏十一月齊閏十二月今從齊歷

四年正月大赦

齊帝紀云庚午大赦按長歷是月己丑朔無庚午故不日

丙辰誅王晏

晏傳云元會畢乃召晏誅之本紀丙辰晏伏誅丙辰正月二十八日也按郊禮必在

正月既云未郊一日敕停則誅晏必非元會之日也本傳蓋言元會禮後耳

二月魏穆泰等伏誅

齊書魏虜傳云偽征北將軍恒州刺史鉅鹿孤賀鹿渾守桑乾宏從

叔平陽王安壽戍懷柵在桑乾西北渾非宏任用中國人與偽定州刺史馮翊公自鄰安樂公主拓跋阿幹兒謀立安壽分據河北期久不遂安壽懼告宏殺渾等數百人任安壽如故與魏書名姓全不同今從魏書

九月魏中書舍人孫延景

齊書作公孫雲今從魏書

十一月以楊靈珍為北秦州刺史

齊氏傳作北梁州今從帝紀

十二月曹虎頓軍樊城

齊魏虜傳云均口今從虎傳

東昏侯永元元年三月張千戰死

魏書作張千達今從齊書

以陳顯達為江州刺史

齊明帝紀永泰元年七月癸卯以顯達為江州本傳顯達敗於

馬圈求降號不許乃除江州又云東昏立顯達彌不樂京師得此授甚喜按明帝末顯達方以三公將兵擊魏不容無故除江州今從本傳

四月魏賜馮后死

元嵩傳曰將遣使者賜馮后死而難其人顧任城王澄曰任城不負我嵩

亦當不負任城可使嵩也乃引高平侯嵩入內親詔遣之高祖紀曰詔司徒勛徵太子與喪會魯陽踐祚按馮后傳梓宮至魯陽乃行遺詔賜后死安有高祖遣嵩之事又勛傳高祖崩勛過祕喪事遣張儒徵世宗亦無高祖詔勛徵太子事

八月垣歷生降曹虎虎斬之

南史云歷生出戰為曹虎所禽謂虎曰卿以主上為

聖明梅茹為賢相我當死且我今死卿明亦死遂殺之按歷生若見獲遙光不當殺其子今從齊書

二年三月左興盛拒崔慧景於北籬門

紀云王瑩屯北籬門傳云左興

盛今從傳

四月癸酉慧景敗走斬之

齊本紀四月丁未以張沖為南京州刺史崔慧景於廣陵

起兵襲京師壬子左興盛督眾軍寶玄以京城納慧景乙卯王瑩屯北籬門壬戌慧景至瑩等敗甲子慧景入

京師蕭懿入援癸酉慧景棄眾走死慧景傳四月至廣陵回軍十二日攻陷竹里按長歷是歲三月辛丑朔四

月庚午朔丁未三月七日壬子十二日乙卯十五日壬戌二十一日甲子二十四日四月皆無也蓋四月當作

三月至癸酉乃四月四日耳南史云時江夏王寶玄鎮京口聞慧景北行遣左右余文興說之曰江劉徐沈君之所見今擁強兵北取廣陵收吳楚勁卒身舉州以相應取大功如反掌耳慧景常不自安聞言響應于時廬陵王長史蕭寅司馬崔恭祖守廣陵城慧景以寶玄事告恭祖恭祖口雖相和心實不同俄而慧景至恭祖閉門不敢出慧景密遣軍主劉靈運間行突入慧景俄係至遂據其城子覺至仍使領兵襲京口寶玄本謂大軍併來及見人少極失所望拒覺擊走之恭祖及覺精兵八千濟江恭祖心本不同及至蒜山欲斬覺以軍降京口事既不果而止覺等軍器精嚴柳愷沈怏等謂寶玄曰崔護軍威名既重乃誠可見既已脣齒忽中道立異彼以樂歸之衆亂江而濟誰能拒之於是登北固樓並千蠟燭為烽火舉以應覺慧景停二日便率大衆一時俱濟趣京口寶玄仍以覺為前鋒恭祖次之慧景領大都督為衆軍節度又云時柳愷別推寶玄崔恭祖為寶玄羽



翼不復承奉慧景慧景嫌之巴陵王昭胄先逃人間出投慧景慧景意更向之故猶豫未知所立此聲頗泄燈恭祖始貳於慧景又云慧景單馬至蟹浦投漁人太叔榮之榮之故為慧景門人時為蟹浦戍斬慧景送都按恭祖始若閉城拒慧景慧景襲得其城而據之豈肯更授以兵柄又慧景若不立寶玄柳橙豈能別推又榮之既云漁人又云為戍自相違錯今並從齊書

九月魏田益宗敗吳子陽于長風城

此一事齊書紀傳皆無之魏帝紀九

月乙丑東豫州刺史田益宗破寶卷將吳子陽鄧元起於長風梁書鄧元起傳云蠻帥田孔明附于魏自號郢州刺史寇掠三關規襲夏口元起率銳卒攻之旬月之間頻陷六城斬獲萬計餘黨皆散走仍戍三關二書勝敗不同如此

今從魏紀

十一月蕭衍召王茂等定議

南史云茂與梁武帝不睦帝諸腹心並勸除之茂少

有驍名帝又惜其用令腹心鄭紹叔往候之告以欲起義茂因擲枕起即袴褶隨紹叔入見武帝大喜下牀迎因結兄弟被推赤心按茂若與梁武不睦梁武何敢豫告以大事茂亦安能便響應今不取

乙巳衍建牙集衆

齊帝紀十二月梁王起義兵於襄陽誤也今從梁書高祖紀

和帝中興元年正月戊申蕭衍發襄陽

梁高祖紀云二月戊申發襄陽

按戊申正月十三日梁紀誤也

三月乙巳南康王即帝位

東昏紀云丁未南康王寶融即皇帝位蓋是日建康始聞之

耳今從和帝及梁武帝紀

六月吳子陽進軍加湖

梁韋叡傳作茹湖今從齊梁帝紀

蕭衍使王茂襲加湖

和帝紀作王茂先今從梁書

郢城民死者什七八

齊張冲傳云死者七八百家按死者不可以家數今從梁高祖紀及

韋叡傳

十月壬午蕭衍築長圍守宮城

齊帝紀與梁帝紀叙此事先後多不同按齊紀

皆有甲子今用梁紀事以齊紀甲子次之

十一月魏田益宗上表請攻義陽

益宗傳曰世宗納之遣元英攻義陽按英

攻義陽在景明四年八月此表言蕭氏君臣交爭則是梁武攻東昏時益宗建策於今日而行於後年耳

益宗入寇黃天賜敗績

魏帝紀七月乙未田益宗破蕭寶卷將黃天賜於赤序田益光

傳景明初蕭衍遣軍主吳子陽率衆寇三關益宗遣光城太守梅與之據長風城逆擊子陽大破之斬獲千餘級按吳子陽乃東昏將非衍將也且衍方與東昏相拒何暇寇魏三關此必益宗傳誤

十二月張稷斬東昏首送石頭

南史王亮傳曰張稷等議立湘東嗣王寶暉領

軍王瑩曰城閉已久人情離解征東在近何不諮問按時和帝已立稷等知建康不可守故弑東昏豈敢復議立寶暉今從齊書

梁紀上

高祖天監元年四月丙寅追尊考妣

南史五月追尊今從梁書

五月河南褚綽

魏蕭寶寅傳作褚冑今從梁書

三年三月魏人歸張惠紹

惠紹傳無被獲及復還事今從魏書

八月遣馬仙琕築二城

司馬悅傳作豫州刺史馬仙琕按仙琕於時未為豫州也

四年正月夏侯道遷以漢中降魏

梁帝紀天監三年二月魏陷梁州而列傳

皆無其事魏帝紀正始元年閏十二月癸卯朔蕭衍行梁州事夏侯道遷據漢中來降道遷傳具言其事按長

歷梁閏二月癸卯即天監四年正月朔也故置於此

四月孔陵等戍深阮

梁鄧元起傳魏將王景胤孔陵冠東西晉壽並遣告急按魏邢巒傳

曰蕭衍晉壽太守王景胤據石亭又曰蕭衍遣其將軍孔陵等據深阮然則景胤陵皆梁將也元起傳誤

西昌侯淵藻殺鄧元起貶為冠軍將軍

梁書元起傳藻以糧儲無遺甚

怨望之因表元起逗留不憂軍事收付州獄自縊死按若止以逗留表元起安敢擅收前刺史付獄殺之必誣以反也今從南史又梁書藻本以冠軍為益州刺史與南史異

五年四月王茂與魏揚大眼戰敗失亡二千餘人

大眼傳云

俘馘七千有餘  
今從魏帝紀

五月韋叡敗魏兵拔小峴

魏帝紀六月辛丑陷小峴戍今從叡傳

或欲保三义

南史作三义  
今從梁書

裴邃克魏羊石霍丘城

梁裴邃傳云五年征邵陽洲魏人為長橋以濟遂築壘逼橋密

作設突艦會淮水暴漲遂乘艦徑造橋側魏衆驚潰遂乘勝追擊大破之進克羊石霍丘城平小峴攻合肥魏帝紀辛巳衍將陷合肥巳丑又陷羊石霍丘案韋叡傳叡攻邵陽洲方使邃乘艦焚橋事在克合肥後又梁帝紀辛巳叡克合肥丁亥邃克羊石庚寅克霍丘今從之邃傳載取二城在破邵陽洲後誤也

九月臨川王宏夜遁將士皆散

梁書宏傳云會征役久有詔班師殊為不實今

從南史

六年三月淮水暴漲

梁帝紀四月癸未景宗等破魏軍魏帝紀四月戊戌鍾離大水英敗

績按曹景宗傳云三月春水生淮水暴長梁魏二史益據奏到月日書之耳今從景宗傳

生擒魏兵五萬人

韋叡傳云其餘釋甲稽顙乞為囚奴者猶數十萬按魏軍共止數十萬如

獻傳所言似為太過  
今從景宗傳

十二月魏常邕和以淮陽降

魏帝紀十月庚午淮陽太守安樂以城南叛今從梁

紀帝

七年九月魏執京兆王愉高肇密使人殺之

魏書及北史愉傳皆

云愉每止宿亭傳必攜李氏盡其私情雖鑕繫之中飲賞自若略無愧懼之色至野王愉語人曰雖主上慈深不忍殺我吾亦何面見至尊於是獻歎流泣絕氣而死或云高肇令人殺之按愉既敗被執猶略無愧懼安能慙見魏主遽感激絕氣而死蓋肇潛使人殺愉因此言給魏主耳

魏中山王英將步騎三萬救郢州

田益宗傳詔曰英統馬步七萬邢巒統精



騎三萬益虛聲  
耳今從魏帝紀

十月魏白早生殺司馬悅

梁帝紀作白阜生馬仙琕傳作琅邪王司馬慶曾今皆從

魏書

齊荀兒

魏書作荀仁今從梁書南北史

以早生為司州刺史

梁帝紀十月丙子魏陽關主許敬珍以城內附詔大舉北伐以始興

王愔帥衆入清王茂帥衆向宿豫丁丑白早生與豫州刺史胡遜以城內屬以早生為司州胡遜為豫州刺史明年正月壬辰魏鎮東參軍成景儁斬宿豫城主嚴重寶以城內屬二月丁卯魏楚王城主李國興以城內附姓名年月事迹既與魏書參差又徧檢諸列傳皆無其事今並從魏書

八年正月馬廣屯長薄胡文超屯松峴

梁馬仙琕傳云遣馬廣會超守

三關今從魏中山王英傳

遣徐元季援武陽

英傳作徐超秀今從魏帝紀

魏主於齊苟兒等四將之中分遣二人以易董紹

紹傳云歸

苟兒等十人今從司馬悅傳

十年正月王珍國罷梁秦二州還

梁書珍國未嘗為梁秦刺史從南史

三月王萬壽殺劉晰

梁帝紀云三月辛丑按長曆是月丁酉朔而盧昶傳云三月二十四

日夜萬壽等攻掩朐城蓋辛酉也今不日以闕疑又梁馬仙琕傳及魏帝紀盧昶傳皆云劉晰而梁帝紀云鄧

晰蓋字  
誤也

十二月馬仙琕大破魏兵

魏帝紀盧昶敗在十一月今從梁帝紀梁紀云斬馘十餘

萬按盧昶表云此兵九千賊衆四萬求益兵六千魏主以四千給之安得十餘萬衆蓋梁史為夸大耳

十二年二月鬱洲民徐道角等殺張稷降魏

魏帝紀作郁州人徐

玄明今從梁康絢傳又絢傳稷死在胸山叛之明年今從魏帝紀

十五年二月康絢擊却魏兵

絢傳十二月魏遣李曇定督衆軍來戰按魏帝紀此

年正月乃遣李平節度諸軍絢傳誤也曇定即平字也

昌義之王神念救硤石

李崇傳衍遣趙祖悅襲據西硤石又遣義之神念率水軍沂淮

上而規取壽春按義之傳絢破  
魏軍義之乃救硤石今從之

十六年四月詔宗廟去牲

梁帝紀此詔在四月甲子南  
史云在二月云祈告天地宗

廟以去殺之理欲被之詔識郊廟牲牲皆代以麴其山  
川諸祀則不按長曆是月辛卯朔無甲子隋志但云四  
月亦不云郊祀  
去牲今從之

十八年二月魏高湖子謚

李百藥北齊書作謚  
北史作謚今從之

高歡曰宿衛焚大臣之第

北齊書云領軍張彞按彞  
未嘗為領軍故但云大臣

資治通鑑考異卷六

欽定四庫全書

資治通鑑考異卷七

宋 司馬光 撰

梁紀下

普通二年五月魏桓叔興降

梁帝紀七月叔興率衆降蓋記奏到之日今從魏帝

紀

七月魏張普惠救義州不及

普惠傳云棄城走今從裴邃傳

三年十一月魏初行正光歷大赦

後魏律歷志云歷成會孝明帝加元服改

元正光因命曰正光歷按帝紀正光元年七月辛卯加元服三年十一月丙午行正光歷今從之

西豐侯正德明年自魏逃歸

梁書正德傳普通六年為輕車將軍頃之犇魏七年

自魏逃歸魏書蕭衍傳正光二年弟子正德來犇南史正德傳普通三年為輕車將軍頃之犇魏又自魏逃歸六年隨豫章王比侵輒棄軍走北史蕭寶寅傳正光四年表論考課後乃云表論正德後乃云莫折大提反按大提反在正光五年唯南北史年月先後相近今從之

四年魏破六韓拔陵反

魏帝紀正光五年破落汗拔陵反詔臨淮王或討之五月或敗

削官按令狐德棻周書賀拔勝傳衛可孤圍懷朔經年勝乃告急於或然則拔陵反當在四年蓋帝紀因詔或討拔陵而言之非拔陵於時始反也周書作破六韓今從之

衛可孤圍武川

北史可作瓌  
今從周書

五年四月魏賀拔勝見臨淮王彧於雲中

勝傳云至朔  
州見彧按後

魏地理志雲中舊名朔州及改懷朔鎮為  
朔州不容更以雲中為朔州今但云雲中

五月魏廣陽王深

魏帝紀作淵今  
從列傳及北史

六年正月魏元瀟僧殺高諒稱帝

瀟僧傳作高謨今從  
魏帝紀又魏紀云自

稱宋王瀟僧傳及北史皆云稱尊號梁書瀟僧傳  
云稱帝按瀟僧立諸子為王必稱帝也今從梁書

瀟僧遣子景仲來降

瀟僧傳云魏室大亂瀟僧據鎮議  
欲匡復既而魏亂稍定將討瀟僧

瀟僧懼歸款按時魏  
亂未定今從北史

元略為魏所敗

魏帝紀叙元略等事便在庚申瀟僧叛下不應如此之速今移於月末

三月元瀟僧驅彭城吏民萬餘人南渡

南史云武官戍彭城者三千餘

人瀟僧皆印額為奴逼將南渡魏書梁書皆無此事

五月魏李崇卒

魏帝紀在五月戊子按長歷是月乙巳朔無戊子今不書日

魏安豐王延明等將兵二萬逼彭城

南史陳慶之傳云衆十萬今從梁書

六月豫章王綜與梁詒淮陰苗文寵投魏軍

南史綜傳綜夜潛與

梁詒苗寵三騎開北門涉汴河遂奔蕭城自稱隊主見延明而拜延明坐之問其名氏不荅曰殿下問人有見識者延明召史視之曰豫章王也延明喜下地執其手荅其拜送于洛陽按魏書及北史鹿念傳皆豫有盟約



魏豈得不知又魏書蕭贊傳作濟陰苗  
文寵北史作濟陰苗文寵今從南史

綜更名贊

梁書南史皆云改名  
續今從魏書北史

延明令江革作大小寺碑

南史作文八寺  
碑今從梁書

十二月魏恒農太守王罷

周書罷傳罷未嘗為  
恒農太守今從魏書

七年六月魏長孫稚為討絳蜀都督

費穆傳穆為都督  
平絳蜀不應有兩

都督今  
從帝紀

八月元洪業殺鮮于脩禮請降于魏葛榮殺洪業自立

北史廣陽王深傳云深以兵士頻經退散人無鬪情連  
營轉柵日行十里行達交津隔水而陣賊脩禮常與葛

榮謀後稍信朔州人毛普賢榮常銜之普賢昔為深統軍及在交津深使人諭之普賢乃有降意又使錄事參軍元晏說賊程殺鬼果相猜貳榮遂殺普賢脩禮而自立與魏帝紀全殊又其語雜亂難曉今從帝紀

十一月曹義宗逼新野魏遣魏承祖辛纂救之

梁書此年冬新

野降魏書肅宗崩後新野猶在恐梁書誤蓋梁自前年攻新野此年魏使魏承祖救之也又周于謹傳云孝昌二年與辛纂討義宗今以為據

大通元年正月莫折天生寇雍州

羊侃傳作莫遮今從魏書

湛僧智圍魏豫州

魏帝紀及曹世表傳作湛僧今從梁夏侯夔傳

十月魏元慶和降陳慶之破魏兵王緯降

魏帝紀九月辛卯東豫州

刺史元慶和以城叛梁帝紀十月庚戌魏東豫州刺史元慶和以渦陽內屬夏侯瓌傳湛僧智園元慶和於廣陵慶和請降詔以僧智為東豫州鎮廣陵韋放傳普通八年曹仲宗攻渦陽放會之滅主王偉降陳慶之傳大通元年隸曹仲宗伐渦陽城主王緯降詔以渦陽置西徐州然則廣陵渦陽兩處兩事梁紀慶和渦陽之間或更有脫字耳魏紀九月據開慶和始叛之時梁紀十月據慶和降款到日按陳慶之傳云自春至冬今從梁紀十月為定此別一廣陵非南兗州之廣陵也王偉當作王緯蓋草書之誤也

二年四月魏長樂王子攸自高渚渡河

楊街之洛陽伽藍記高渚作雷

波今從魏書

己亥魏百官迎敬宗於河橋

伽藍記云十二日爾朱榮軍於芒山之北河陰之野

十三日召百官迎駕至者盡誅之長歷是月戊子朔十二日己亥也今從魏書

榮殺魏高陽王雍以下二千餘人

北史云榮惑費穆之言謂天下乘機可取

乃譎朝士共為盟誓將向河陰西北三里至南北長隄悉命下馬西度即遣胡騎圍之妄言丞相高陽王反殺王公以下二千餘人榮傳一千三百餘人今從魏紀

趙元則應募為禪文

北史曰時隴西李神儁頓丘李諧太原溫子昇竝當世辭人皆在圍

中耻從是命俯伏不應按神儁等不應何得不死魏書本傳皆無其事

高歡勸榮稱帝

魏爾朱榮傳曰於是獻武王與外兵參軍司馬子如等切諫陳不可之理榮曰

愆誤若是唯當以死謝朝廷今日安危之機計將何出獻武王等曰未若還奉長樂以安天下於是還奉莊帝

北齊書神武紀云榮將篡位神武諫恐不聽請鑄像卜之鑄不成乃止蓋魏收與北齊史官欲為神武掩此惡故云爾今從周書賀拔岳傳

十月以元顥為魏王遣陳慶之將兵送之

梁魏帝紀皆云以顥為魏

主唯顥傳作魏王按魏封劉昶為宋王蕭寶寅為齊王蕭詧為梁王皆伺得國然後使稱帝耳若顥在南已稱魏帝當行即位之禮又梁朝應以客禮待之又顥不應再即帝位於渙水蓋由王字與主字止欠一點故多致謬誤今從顥傳

中大通元年二月魏濟陰王暉業

梁書作徽業今從魏書

四月元顥即帝位改元

魏帝紀去年十月蕭衍以顥為魏主號年孝基入據鉅城顥傳

永安二年四月於梁國城南  
登壇燔燎年號孝基今從之

陳慶之拔考城

魏書帝紀克考城在  
辛丑後今從梁帝紀

五月魏臨淮王彧迎顥

或傳無迎顥事而梁陳慶之北  
齊宋遊道傳有之蓋魏史為或

諱也

二年三月魏万俟倅

北史作万俟行  
醜今從周書

六月以魏汝南王悅為魏王

梁帝紀中大通元年正月  
甲子魏汝南王悅求還本

國許之二年六月丁巳遣悅還北為魏主按魏  
書悅傳悅未嘗歸魏復入梁今刪去元年事

万俟道洛歸略陽賊帥王慶雲

魏帝紀作白馬龍涸胡  
王慶雲今從尔朱天光

傳

八月遣兵送魏王悅至境上

悅傳云立為魏主號年更興衍遣其將軍王僧辯送

置境上以冀侵逼按僧辯傳未嘗送悅蓋王弁耳

魏邢邵巒之族弟

北史邢巒卷首排目云族孫臧邵而卷中乃云巒叔祖祐祐從子蚪蚪子

臧邵魏書亦云巒從祖祐然則臧邵乃巒族弟非族孫也

爾朱榮妻鄉郡長公主

北史世隆傳作北鄉郡公主今從魏帝紀

九月榮至洛陽

魏帝紀曰辛卯榮天穆自晉陽來朝按北史九月初榮至京十五日天穆至是

月甲戌朔辛卯乃七八日非也

資治通鑑

資治通鑑考異

六

尔朱世隆走賀拔勝不從

周書及北史云勝復隨世隆至河橋勝以為臣無讐君之

義遂勒所部還都莊  
帝大悅今從魏書

十月尔朱拂律歸

魏書無拂律歸名伽藍記有之按尔朱度律時在世隆所或者拂律歸即

度律也

魏源子恭鎮太行丹谷

伽藍記云源子恭楊寬領步騎三萬鎮河内今從魏書

尔朱世隆至長子

魏帝紀云世隆停建興之高都今從世隆傳

十二月尔朱兆從河橋西涉渡

伽藍記云從雷波涉渡今從魏書兆傳

魏城陽王徽抵寇祖仁家

魏書作寇彌按寇讚諸孫所字皆連祖字或者名彌字祖



仁今從  
伽藍記

尔朱兆召高歡并力

北齊慕容紹宗傳兆召高祖紹宗諫曰今天下擾攘人懷覬覦正是

智士用策之秋高晉州才雄氣猛英略蓋世譬如蛟龍安可以借雲雨兆怒曰我與晉州推誠相待何得輒相間阻因紹宗數日乃釋之北史紹宗語在神武請帥降戶就食山東下按兆始召歡以自救非猜嫌之時今從北史

三年二月魏廣陵王恭陽瘖

伽藍記云莊帝疑恭姦詐夜遣人盜掠衣物拔刀劒

欲殺之恭張口以手拈舌竟乃不言莊帝信其真患放令歸第今從魏書

尔朱兆監軍孫白鷄

北史作白雞今從北齊書

四月尔朱仲遠使魏僧勉討崔祖螭斬之

北齊李渾傳普泰中崔社

客反於海岱攻圍青州以渾為征東將軍都官尚書行臺赴援而社客宿將多謀諸城各自保固堅壁清野諸將議有異同渾曰社客賊之根本若簡練驍勇銜枚夜襲徑超營下出其不意咄嗟之間便可擒殄如社客就擒則諸郡可傳檄而定諸將遲疑渾乃決行未明達城下賊徒驚散擒社客斬首送洛按其年時事迹與祖螭略同未知社客即祖螭為別一人也今從魏帝紀

六月庚申高歡起兵信都

魏書帝紀起兵在庚申北齊書帝紀在庚子北史魏紀齊

紀亦然今從魏書紀

魏楊愔見高歡於信都

北齊書愔傳云愔父津為并州刺史愔隨之任俄而孝莊幽崩

愔時適欲還都行達邯鄲過津義從楊寬家為寬所執至相州見刺史劉誕以愔名家盛德甚相哀念遣隊主鞏榮貴防禁送都至安陽亭榮貴遂與俱逃乃投高昂兄弟潛竄累載屬齊神武至信都遂投刺轅門即署行臺郎中按時齊神武已在信都言潛竄累載誤矣又云孝莊幽崩而愔欲還都見執皆非也

四年四月高歡以賀拔岳為關西大行臺

北史薛孝通為中書郎以

關中險固秦漢舊都須預謀鎮遏以為後計縱河北未利猶足據之節閔帝深以為然問誰可任者孝通與賀拔岳同事天光又與周文帝有舊二人竝先在關右竝推薦之乃超授岳督岐華秦雍諸軍事關西大行臺雍州牧周文帝為左丞孝通為右丞齋詔書馳驛入關授岳等同鎮長安後天光敗於韓陵節閔遂不得入關為齊神武幽廢按天光尚在節閔安敢除岳鎮關中今從魏書

高歡欲立汝南王悅聞其狂暴乃止

魏書悅傳云神武令人示意悅既至

清狂如故動為罪失不可扶立乃止按悅時猶在梁境北召至洛往返幾日蓋神武聞其所為而止耳

五年正月魏竇泰破尔朱兆

魏帝紀正月庚寅朔甲午齊獻武王自晉陽出討兆

丁酉大破之於赤洪嶺北齊帝紀出兵在去年破兆在今年按歲首宴會不應直至八日今從北齊書

五月魏王早等來降

梁帝紀六月己卯魏建義城王蘭寶以下邳城降今從魏書

七月魏以賀拔允為太尉

魏帝紀作賀拔渥按允字阿鞠渥蓋渥字誤為渥耳

六年正月魏泉企討民夷平之

北史作泉企今從周書

六月高歡表魏主庫狄干等將兵自來違津渡

丘悅三國典略

作朱違津今從  
北齊書北史

七月高歡引軍渡河元斌之給魏主云歡兵已至

魏書  
斛斯

椿傳云椿懼已不免復啓出帝假說遊聲以劫脅帝帝  
信之遂入關按齊高祖舉兵向洛而云椿劫脅帝不亦  
誣乎此乃魏收欲媚齊人重椿之  
罪耳今從齊高祖紀及北史椿傳

九月歡使薛瑜守潼關

北史作薛瑾典略作薛長瑜北  
齊帝紀作薛瑜今從北齊書

十月歡至洛陽

齊書北史皆云九月庚寅還至洛陽按  
歡九月己酉克潼關己酉九月二十九

日也不容庚寅已還至洛  
陽庚寅乃九月十日也

閏月蠻酋樊五能

北史作樊大  
能今從魏書

欽定四庫全書

資治通鑑考異

大同元年十一月魏元羅降

典略在七月今從梁帝紀

二年正月魏人圍曹泥

北齊書典略皆云周文圍泥周書不言故但云魏人

二月東魏以高澄為尚書令加領軍京畿大都督

魏帝紀為

尚書令大行臺大都督北齊文襄紀天平元年為尚書令大行臺并州刺史入輔朝政加鎮軍左右京畿大都督按尚書令不在外大行臺不在內今兩捨之

東魏孫搴卒陳元康為功曹

典略孫搴卒在大同十年四月按搴卒然後陳元康

為功曹高慎叛高澄已令元康救崔暹邛山之戰元康又勸高歡追宇文泰事並在九年北史元康傳又云草劉蠡升軍書按蠡升滅在元年孫搴二年猶存今不取然則搴卒宜置於澄入輔之下

五月魏万俟普犇東魏

普降東魏事北齊書帝紀在三月甲午典略在六月北史齊紀

在六月甲午周書帝紀北史魏紀齊紀在五月今從之

十二月東魏清河王亶卒

國典云亶為高歡所酖典略周太祖數歡罪亦云殺亶魏

書北史皆無亶傳而帝紀皆云亶薨今從之

三年閏九月高歡自蒲津濟河

北齊帝紀十一月壬辰神武自蒲津濟魏帝紀

十月壬辰敗于沙苑按長曆十月壬辰朔北齊紀誤也

四年二月東魏侯景攻廣州降之

典略侯景克廣州在十一月按北史魏文

帝紀二月東魏陷南汾潁豫廣四州今從之

欽定四庫全書

資治通鑑考異

十

三月高歡解大丞相頃之復故

比齊帝紀止有高祖解丞相年月而無復故之

文按興和元年議歷有丞相田曹參軍信都芳蓋因印山之捷而復也

五月東魏鄭伯猷來聘

魏帝紀在二月丙辰蓋始受命時也今從梁帝紀

七年正月宕昌王梁彌定立

梁帝紀作弥泰今從典略

十二月劉敬躬以妖術惑衆

北史作敬宮今從梁書

八年十二月東魏楊斐來聘

典略作陽斐今從魏書紀

九年三月東魏大破魏兵斬首三萬餘級

北齊書云俘斬六萬計今

從北史  
彭樂傳



東魏尉興慶戰死

典略作尉興敬今從北齊書北史

東魏軍士逃奔魏者告以高歡所在

周賀拔勝傳云太祖見齊神武旗鼓

識之今從典略

十一年六月楊暕陳霸先至交州

典略作十二月癸丑至交州姚思廉陳書

帝紀在六月今從之

中大同元年正月癸丑楊暕等克嘉寧城

典略作乙未今從梁帝紀

三月幸同泰寺講經

典略云癸卯詔以今月八日於同泰寺設無遮大會捨朕身及以宮

人并所王境土供養三寶四月丙戌公卿以錢一億萬奉贖按韓愈佛骨表云三度捨身為寺家奴若并此則

四矣今  
從梁書

九月李賁屯典澈湖

典略云渡武平江據新安村今從陳帝紀

十月高歡攻玉壁五十日士卒死者七萬人

北史韋孝寬傳云苦

戰六旬傷及病死者什四五今從北齊書

太清元年三月侯景請以十三州內附

梁書景傳云與豫州刺史高成

廣州刺史暴顯潁州刺史司馬世雲荊州刺史郎椿襄

州刺史李密兖州刺史邢子才南兖州刺史石長宣濟

州刺史許李良東豫州刺史丘元征洛州刺史尔朱渾

願揚州刺史樂恂北荊州刺史梅季昌北揚州刺史元

神和等陰結私圖尅相影會蕭韶太清紀又有兖州刺

史胡延豫州刺史傅士哲揚州刺史可足渾洛無邢子

才典略有荊州刺史庾狄暢無高成暴顯許季良尔朱  
渾願樂恂梅季昌今依梁書而太清紀有兩豫州蓋前  
也官

是歲正月乙卯帝夢中原牧守皆降

典略云去年十二月夜夢今從梁書

四月東魏李系來聘

魏帝紀作李緯今從本傳

六月東魏韓軌等圍潁川聞魏李弼等將至引還

周書帝紀

三月李弼救侯

景今從典畧

高澄使高德政佐弟洋

北史作德正今從北齊書

十二月乙亥以元貞為咸陽王

梁帝紀作戊辰遣貞今從典略

二年正月侯景衆潰晝夜兼行追軍不敢逼

典略云晝夜行追

軍漸逼今從梁書

羊鴉仁棄懸瓠羊思達棄項城

典略在六月今從梁帝紀

三月屈獠洞斬李賁

陳高祖紀云太清元年蓋謂破賁之年今從梁帝紀

八月侯景啓請戮羊鴉仁

梁書南史皆云竝抑不奏典略朱异拒之云云今從太清

紀

侯景反西攻馬頭

梁書云執太守劉神茂按神茂素附於景無煩攻執今從太清紀典略

十月庚寅景陷譙州

太清紀云十三日陷譙城下又云十三日以王質巡江遏防典略上

作庚戌下作庚子按此月  
戊子朔蓋三日庚寅也

太子戎服入見上稟受方略

太清紀云太宗見事急乃入面啓高祖曰請以軍事

竝以垂付願不勞聖心南史云帝曰此自汝事何更問為今從典略

十一月陳昕說范桃棒降

太清紀南史皆云桃棒求以甲士二千人來降以景首應

購今從典略

乙酉邵陵王綸進軍玄武湖側

太清紀云二十九日典略云壬午今從梁帝紀

景擒莊丘慧霍俊等

典略作廣陵令崔俊南史作直閣將軍胡子約廣陵令霍雋今從太

清紀

鄱陽世子嗣軍于蔡州

梁帝紀作張公洲今從太清紀

湘東王繹遣王僧辯將舟師萬人東下

太清紀云僧辯將精卒二萬今

從梁書

十二月宣猛將軍李孝欽

梁帝紀作李遷仕今從太清紀

三年正月庚申朱忌卒

梁帝紀作乙丑今從太清紀典略

甲子湘東世子方等軍至

梁帝紀作戊辰今從太清紀

二月庚子南康王會理等衆三萬至馬印洲

梁帝紀作丁未今從

太清紀典略典略云至于琅邪今從太清紀梁帝紀

移軍江潭苑

梁帝紀作蘭亭苑  
今從太清紀典略

三月初閉城之日擐甲者二萬餘人

南史作三萬  
今從典略

南安侯駿說邵陵王綸

典略云綸以下咸說柳  
仲禮如此今從太清紀

柳津言邵陵仲禮不忠不孝

典略云柳仲禮族兄暉謂  
仲禮曰天下事勢如此何

不自取富貴仲禮曰兄今若為取之暉曰正當堅營不  
戰使賊平臺城囚天子徐而縱兵既破之後復挾天子  
合諸侯也仲禮納之按景仲禮既克城則人情皆去援軍自  
散仲禮安能帥以破景仲禮閉壁不出自為重傷而懼  
耳非用暉計也今從太清紀及南史太清紀又云景嘗  
登朱雀門樓與之語又遺以金自是以後閉壁不戰典  
略云遺以金鑲亦  
似近誣今不取

景矯詔大赦自加官

梁帝紀無赦加景官在庚午今從太清紀

己巳景以詔解外援軍

典略在庚午梁帝紀在辛未今從太清紀

北青州刺史王奉伯降東魏

典略作南冀州今從太清紀

明少遐等棄城走

梁帝紀在四月今從太清紀

五月甲申景遣李賢明攻宣城不克

典略在四月今從太清紀

六月丙戌以南康王會理為司空

梁帝紀作戊戌今從太清紀

丁亥立宣城王利器為太子

太清紀云七日今從梁帝紀及典略

壬辰封皇子大心等為王

太清紀典略竝與立太子同日今從梁帝紀



上甲侯韶徵兵江陵

梁帝紀在五月  
今從太清紀

丙午吳盜陸緝

典略作戊子陸黯  
今從太清紀南史

癸丑侯景殺臨賀王正德

典略五月正德死  
今從太清紀南史

景封元羅等十餘人皆為王

太清紀在八月二  
十八日今從典略

景殺永安侯確

太清紀確死在  
九月今從典略

湘東王繹使世子方等討河東王譽

太清紀云初上遣  
諮議參軍周弘直

往湘州報河東王譽云侯景既須撲滅今欲遣荊州兵  
力使汝東往但使諸蕭有一人能匡國難吾無所惜譽  
對弘直攘袂云身始至鎮百度俱闕征伐之任便未能  
行又遣舍人虞預至譽所曰周弘直還知汝必不能自

出師吾今便長驅席卷還望三湘兵糧以相資給譽又拒絕意色殊憤上又遣錄事參軍劉穀往雍宣旨於岳陽王譽曰吾舟艦足乘唯糧仗闕少湘州有米已就譽求雍部精兵必能分遣行留之計爾自擇之譽荅曰兵馬藩扞所須非敢減撤襄陽形勝之地豈可暫虛穀出謂雍州別駕甄玄成曰觀殿下辭色曾無匡復之意卿是股肱所寄可相毗贊邪荅曰樊沔衝要皇業所基人情驍勇山川險固君其雅識寧俟多言穀曰本論東討共征獯逆義異西伯非敢聞命於是湘雍二藩成亂謀矣是月上遣世子方等往湘州具陳軍國之計誠方等曰吾近累遣使往湘竝未相唇齒今故令汝至彼必望申吾意若能得相隨下可留王冲權知州事譽遂不受命潛圖構逆此皆蕭韶為元帝隱惡飾辭耳今從梁書南史

七月陳霸先擒蘭裕等

太清紀擒裕在八月今從陳書

丁卯鮑泉伐湘州

太清紀作八日或者八日受命丁卯乃行也

庚午以南康王會理兼尚書令

太清紀在八月二十六日今從典略

八月東魏高澄以蘭京為善奴

陳元康傳作蘭固成今從北齊帝紀

九月岳陽王詒伐江陵兵敗守者殺張纘

太清紀云詒使制文檄纘

曰吾蒙朝廷不世之榮又荷湘東王國士之眷今日雖死義無操筆及軍敗將殺之纘曰若使南師必振北賊將亡吾雖死無所恨遂殺之棄尸於江陵北湖又云諸將竝欲追躡上以如子之情情所未忍曰彼不應來而來明其為逆我應逐不逐見我之弘此蓋亦蕭韶之虛美今從南史

十一月乙卯葬武帝

太清紀云十四日梓宮達于脩陵今從梁書

邵陵王綸犇鄱陽

南史云東土皆附綸臨城公大連懼將害已乃圖之綸覺之乃去今從典

略

十二月庚寅宋子仙執南郡王大連

典略云十二月庚子朔擒大連按是

月壬午朔今從太清紀

太宗大寶元年正月陳霸先進軍南康

太清紀在二月今從陳帝紀

南康王恪推邵陵王綸承制置百官

太清紀云三月綸逼奪恪州徙恪於

郡解今從梁書典略

魏楊忠敗柳仲禮於滌頭

太清紀作潼頭在去年十二月今從典略

二月侯子鑒克廣陵城中無少長皆殺之

太清紀曰城中數百人典

略曰死者八千人今從南史

五月乙卯鄱陽王範卒

典略作己酉卒今從太清紀

丙辰東魏主禪位于齊

北齊書北史高德政傳云五月六日留咸陽王坦等七日司馬

子如等至鄴九日文宣至城南頓按後魏書北史帝紀皆云辛亥王如鄴甲寅加九錫丙辰辰主遜位戊午王即帝位典略辛亥王還鄴以長歷推之此月己酉朔皆不與德政傳日相應蓋辛亥始自晉陽如鄴非到鄴之

也日

武陵王紀使世子圓照帥兵東下

南史云六月辛酉紀遣圓照東下按六月

已卯朔無辛酉典略在五月或者五月辛酉歟

六月丁亥齊主立李后

典略在五月乙丑今從北齊帝紀

庚子羊鴉仁犇江西盜殺之

太清紀在十月今從梁帝紀典略

高涼洗氏

典略作沈氏今從隋書

七月侯景以侯瑱為湘州刺史

太清紀在十一月今從典略

八月甲午湘東王繹遣王僧辯等趣江郢

典略云九月戊申朔繹遣

僧辯按太清紀事在八月末今從梁簡文帝紀

九月任約據西陽武昌

梁帝紀在十一月今從太清紀

任約擒衡陽王獻送建康殺之

梁帝紀在十一月今從太清紀

十月立皇子大鈞等為王

太清紀在十一月十四日今從梁帝紀

十一月武陵王紀帥諸軍發成都

南史云十一月壬寅按是月壬子朔無壬

寅

侯景自出屯晉熙

典略七月景軍次濡須使梁仲宣知留府事按典略九月景請梁妃主同

宴梁帝紀十月乙未景逼太宗幸西州不容七月已在濡須今因南康王會理事見之太清紀梁書典略晉熙

皆作皖口今從南史

王偉殺南康王會理

典略云十二月癸未建安侯賁等告會理梁帝紀十月壬寅景害會

理今從  
太清紀

侯景殺武林侯諮

太清紀在會理  
死前今從南史

二年正月湘東王繹遣尹悅等將兵趣武昌

典略在去  
年十一月

今從太  
清紀

張彪將趙稜孫鳳敗走

典略去年十一月彪自圍錢塘  
與趙伯超戰敗于臨平死者八

萬餘人走還剡伯超兄子稜在彪軍中謀殺彪偽請與  
彪盟引小刀披心出血自軟彪信之亦取刀刺血報之  
刀適至心稜以手按之刀斜入不深彪頓絕稜謂已死  
出外告彪諸將云彪已死當共求富貴彪左右韓武入  
視之彪已蘇細聲謂曰我尚活可與乎武遂  
誅稜彪復奉表於湘東王繹今從太清紀



二月魏楊忠執邵陵王綸

太清紀云宇文泰遣忠襲綸詐稱來相禮接綸白服與相

見執而害之今從梁書南史

齊遣曹文皎使于江陵

典略在正月丙午朔今從太清紀

陳霸先擒李遷仕斬之

太清紀在四月云遷仕追霸先於雩都縣連營相持百餘日是

月廣州刺史蕭勃遣歐陽隗水步萬餘人來援隗與戰大破之斬遷仕首餘黨悉降霸先引軍前進今從陳書

閏月侯景發建康

梁帝紀三月丁未景發京師典略云閏三月丁未按乙卯徐文盛克武昌

不容丁未景已發建康閏三月甲戌朔無丁未蓋字誤也

四月壬戌景衆濟江

梁帝紀作甲子今從太清紀

六月景別將支化仁鎮魯山

梁帝紀作魏司徒張化仁按魏司徒安得為景守城

今從  
典略

范希榮行江州事

典略云江州刺史今從太清紀

余孝頃遣兵救鄱陽于慶走

長歷六月癸卯朔太清紀一曰慶走二曰擒任約三

曰景走今  
從梁帝紀

七月丁亥侯景還至建康

典略作六月壬戌太清紀作七月二十日今從梁帝紀

八月壬戌豫章王棟即帝位

典略作壬辰今從太清紀

景殺南郡王大連於姑熟

太清紀云於九江今從梁書

十月宜豐侯循

南史作脩  
今從梁書

丙辰王僧辯等啓湘東王繹上尊號

典略作乙卯  
今從太清紀

十一月戊寅繹以安南侯方矩為中衛將軍

梁書在八月  
辛亥今

從太

清紀

世祖承聖元年正月己卯侯子鑒等帥兵至合肥

典略  
二月

庚子子鑒等圍合肥克

其羅城今從太清紀

突厥子弟謂之特勒

諸書或作特勤今從劉昫  
舊唐書及宋祁新唐書

三月侯子鑒以鵠舫千艘載戰士

典略作鳥鵠舫  
千艘今從梁書

庚辰王僧辯督諸軍至張公洲

典略作戊寅今從太清紀

陳霸先於石頭西落星山築柵

陳書云橫隴立柵今從典略

己丑僧辯等上表勸進

梁帝紀戊子王以賊平告明堂太社己丑僧辯等奉表按表文

云衆軍以戊子總集建康豈是日告捷即能達江陵乎蓋僧辯等以己丑日發表勸進耳

四月僧辯啓陳霸先鎮京口

陳紀高祖應接郭元建還僧辯啓高祖鎮京口按是

時徐嗣徽為南徐州刺史蓋霸先但領兵戍京口耳未為刺史也

羊鯤叱海師向京口

典略曰舟人李橫文紹景向南徐州今從梁書

溧陽公主亦預食焉

典略云復烹溧陽公主今從南史

五月遣侍中豐城侯泰等謁山陵

梁書在四月官為司空太清紀在此月官

太宰今從典略

九月魏宇文泰遣西豐侯循還江陵

典略云十月乙未朔太祖謂循云云

按太清紀是月循至江陵今從之

十一月李洪雅保空雲城

典略作空零城今從梁書

二年二月突厥科羅立號乙息記可汗

顏師古隋書突厥傳云弟逸可

汗立今從周書及北史

三月柔然又立鄧叔子為可汗

魏書北史蠕蠕傳皆云立鐵伐為可汗突厥傳

皆云立鄧叔子為可汗蓋部落分散各有所立也

俟斤立號木杆可汗

周書作木汗隋書作俟斗木杆今從北史

魏宇文泰遣尉遲迴伐蜀

典略在正月戊辰今從周紀

陸納遣吳藏等據車輪

梁紀云二月丙子按長歷二月無丙子梁紀誤

王僧辯至巴陵

典略云三月辛酉按長歷是月癸亥朔無辛酉典略誤

宜豐侯循讓都督於僧辯

僧辯傳云與陳霸先讓都督今從典略

四月丙申僧辯軍于車輪

典略作甲子非也今從梁紀

六月湘州平

梁紀乙酉湘州平按長歷是月無乙酉梁紀誤

七月辛未苻昇等斬公孫晃降於王琳

典略作丙戌今從梁書

九月齊主遣邢景遠步大汗薩將襲建康

梁書作邢景遠步六汗薩

今從北齊書北史

三年正月齊主破山胡男子十三以上皆斬

北史作十

從典略

宇文泰廢魏王立齊王廓

國典云三月廢帝四月立恭帝北史皆在正月今從之

三月甲辰以王僧辯為太尉

典略作二月甲子今從梁紀

五月魏李遷哲徇地至巴州牟安民降之

典略云斬梁巴州刺史牟

安平今從  
周書北史

十一月甲寅魏人百道攻城

梁紀作辛卯誤也今從典略

帝焚圖書十四萬卷

隋經籍志云焚七萬卷南史云十餘萬卷按王僧辯所送建康書已

八萬卷并江陵舊書豈止七萬卷乎今從典略

胡人牽帝使拜于謹

典略云謹攜梁主令西至龍泉廟出武陵河東二王子孫於獄列於

沙州鎖械嚴酷瘡痍腐爛引梁主使視之謂曰此皆骨肉忍虐如此何以為君上無以應按武陵諸子先已餓死河東子孫亦應不存今不取

十二月于謹選百姓男子數萬口為奴婢

典略作五十萬今從梁紀



南史

敬帝紹泰元年正月梁王詒即帝位

周書詒傳云詒在位八載保定二年

薨然則詒雖以甲戌年為魏所立乙亥年乃即位改元也

齊清河王岳進軍臨江陸灋和宋蒞降之

北史宋蒞作宋蒞今從北

齊紀又北齊紀云壬寅岳度江克夏首送灋和按典略甲午齊已召岳還今從之

甲午齊召岳還使慕容儼戍郢州

梁紀四月灋和降齊使侯瑱討之按齊主

與王僧辯書云清河王岳今次漢口與陸居士相會然則灋和先已降齊也今從典略

五月王僧辯遣使送質於貞陽侯淵明

典略三月辛卯遣廷尉張種等

送質于鄴按淵明五月  
始入建康疑太早恐非

辛丑淵明自采石濟江

梁紀七月辛丑淵明濟江甲辰  
入京師北齊紀五月蕭明入建

業按典略五月庚子僧辯逆淵明  
辛丑濟江癸卯至建康今從之

九月丙午淵明遜位

梁書九月丙午帝即皇帝位十月  
己巳大赦改元按長曆丙午九月

二十九日己巳十月二十二日豈有即位二十四日始  
改元大赦乎蓋丙午復梁王位十月乃即帝位耳典略  
丁未廢貞陽侯出  
就邸今竝從陳書

十月韋載以郡應杜龕

典略作韋載  
今從梁陳書

王僧智據吳郡拒守

南史云僧智奔  
任約今從典略

陳霸先還建康

梁書十一月庚寅霸先還建康按庚寅十一月十三日太晚且庚寅以前霸先

已有在建康與齊相拒事迹今從陳書

十一月癸未侯安都襲胡野

典略作己巳按長曆是月戊寅朔無己巳今從陳書

太平元年正月陳蒨斬杜龕

梁書太平元年正月癸未杜龕降詔賜死陳書紹泰

元年十二月杜龕以城降明年正月癸未誅杜龕於吳興龕從弟北叟司馬沈孝敦並賜死典略魏恭帝二年十二月蒨命劉澄等攻龕大敗之龕乃降明年正月丁亥周鐵虎送杜龕祠項王神使力士拉於坐龕從弟北叟司馬沈孝敦並賜死今從南史

王僧智弟僧悊俱薨齊

梁書南史王僧辯傳僧悊既亡僧智得就任約約敗走僧智肥

不能行又遇害僧智弟僧愔位譙州刺史征蕭勃及聞兄死引軍還時吳州刺史羊亮隸在僧愔下與僧愔不平密召侯瑱見禽僧愔以名義責瑱瑱乃委罪於將羊鯤斬之僧愔復得奔齊陳書南史侯瑱傳則云僧辯使其弟僧愔與瑱共討蕭勃及陳武帝誅僧辯僧愔陰欲圖瑱而奪其軍瑱知之盡收僧愔徒黨僧愔奔齊典略魏恭帝三年正月初僧愔與瑱共討曲江侯勃至是吳州刺史羊亮說僧愔襲瑱而翻以告瑱瑱攻之僧愔奔齊凡此諸說莫知孰是今約其梗槩言之

四月侯安都襲齊司馬恭

梁書云壬午安都襲恭按長歷是月乙巳朔無壬午

五月齊人詐許退師

典略云五月齊主在東山飲酒投杯赫怒召魏收於前立為制書欲

自將西討長安令上黨王渙將兵伐梁於是渙南侵按梁陳北齊帝紀及渙傳皆無是事今去之

侯安都擒齊乞伏無勞

南史作乞伏無勞今從陳書

十一月齊併省一百五十三郡

北史作五十六郡今從齊書

十二月齊築長城

去歲六月已云築長城而地名長短不同不知與此為一事為二事北齊

書北史皆然今兩存之

### 陳紀上

高祖永定元年二月蕭孜勃之從子

陳書南史周文育傳皆作子今從梁

紀書帝

南江州刺史余孝頃

典略作南康州刺史今從梁書

十月侯安都等大敗

典略云乙亥安都敗陳書云是月敗績按高祖以乙亥受禪安都聞

之而嘆豈同日乎今從陳書

二年二月沈泰犇齊

北齊帝紀在八月今從陳帝紀

三月齊司馬消難降周

北齊帝紀四月消難叛今從周書典略

齊主自晉陽還鄴

北齊帝紀天保七年八月帝如晉陽不言其還八年四月帝在城東馬射

敕京師婦女悉赴觀是在鄴也此月又言至自晉陽六月乙丑帝自晉陽北巡則又復在晉陽必有差誤今不

敢增損

王琳奉梁永嘉王莊即帝位

北齊帝紀十一月丁巳琳遣使請立莊仍以江州內

屬令莊居之十二月癸酉詔莊為梁主進居九派今從陳書及典略然陳書典略皆云立莊於郢州按琳時在潁城蓋知居江州後遷郢州耳

十一月齊主刺尉子輝

北史作子耀今從北齊書典略

齊常山王演因諫諍被毆撻

北史孝昭紀云文宣賜帝魏時宮人醒而忘之謂帝

擅取遂令刀環亂築因此致困今從北史王晞傳

世祖天嘉元年二月侍中袁泌

北齊書作長史袁泌今從陳書

齊常山王演出歸第

北齊書孝昭紀云除太傅錄尚書朝政皆決於帝月餘乃居藩邸今

從楊惲傳

可朱渾天和道元之子

典略云道元弟今從北齊書

武衛娥永樂叩刀仰視

北齊書作領軍劉桃枝今從北史

二年正月合州刺史裴景徽

北齊書作景暉今從陳書

三年正月周遣杜杲送安成王頊南歸

典略作杜杲今從周書

閏二月改鑄五銖錢

隋志在天嘉五年今從陳帝紀

九月丁亥詔安成王頊代吳明徹攻周

陳書帝紀云丁亥迪請降

詔安成王頊督衆軍以招納之今從南史迪傳

四年正月齊魏收除名

北齊書帝紀正月乙亥收為僕射已卯除名相去五日不容如



此之速恐誤  
今去其日

九月周楊荐使突厥復命

典略在保定二年按王慶傳云是歲乃興入并之役故置

此於

臨海王光大元年二月安成王頊欲收韓子高毛喜止

之

陳書文沈后傳云安成王既專沈太后憂悶計無所出乃密賂宦者蔣裕令誘建安人張安國使據郡反

龔因此以圖高宗安國王覺竝為高宗所誅時后左右近侍頗知其事后恐連逮黨與並殺之按后欲圖高宗而令安國據建安反理不相涉且后若實有此謀高宗既立后豈得自全今刪去

到仲舉韓子高賜死

陳書子高傳死在光大元年八月按華皎傳子高誅後皎始謀叛帝

紀此年五月皎已謀反又慈訓太后令先言劉師知子高誅後乃及余孝頃始興王伯茂傳師知等誅後伯茂乃進號中衛然則子高傳誤也

齊封皇弟仁直為丹陽王

北齊書帝紀名統今從列傳

周亮定以步騎數千圍郢州

陳帝紀云步騎二萬蓋夸誕之辭今從周

徐度執元定盡俘其衆

陳書云獲萬餘人馬四千匹亦恐夸誕今不取

資治通鑑考異卷七

欽定四庫全書

史部

資治通鑑考異卷八

九

詳校官修撰臣錢 榮

洗馬臣王坦修覆勘

總校官庶吉士臣張能照

校對官編修臣裴 謙

謄錄舉人臣洪道濟

欽定四庫全書

資治通鑑考異卷八

宋 司馬光 撰

陳紀下

高宗太建元年二月齊和士開殺趙郡王叡

北齊帝紀天統三年

六月以并省尚書左僕射婁定遠為尚書左僕射五年二月殺趙郡王叡三月以并省尚書令婁定遠為司空婁定遠既為僕射復為并省尚書令也按和士開傳先出定遠然後殺叡叡死必在定遠作司空後帝紀誤也但定遠為果在何時耳又士開傳云出為青州定遠傳云尋除瀛州蓋先出為青州後乃除瀛州也

七月太子納沈妃

陳書北史沈后傳皆云太建三年拜皇太子妃誤也今從帝紀

三年三月周齊公憲自龍門渡河

北齊書段韶傳云二月周師來寇周書帝

紀云三月憲渡河今從之

四月周陳公純等取齊宜陽等九城

北齊斛律光傳云周柱國紇于廣略

園宜陽今從周帝紀

六月齊段韶圍定陽城

韶傳七月屠其外城周書北齊帝紀皆云六月陷汾州今從之

段韶擒楊敷盡俘其衆

周書齊王憲傳屢破齊師北齊書斛律光段韶傳屢破周師要

之周失汾州齊師勝耳

四年二月齊以衛菩薩為太尉

北齊書北史並同不知菩薩何人亦不言何官

十二月周阿史那后無寵

周書云后有姿貌善容止周帝甚敬焉按房玄齡唐高祖

實錄云武帝納突厥女為后陋而無寵太穆皇后勸帝強撫慰之今從之

五年四月齊遣軍救歷陽

陳書帝紀云齊遣兵十萬援歷陽黃灋範傳云步騎五萬

援歷陽蕭摩訶傳云尉破胡等率衆十萬來援案源文宗之語恐無此數今不取

齊軍大敗尉破胡走

北齊書破胡敗在五月今從陳書

五月齊蘭陵王長恭以邳山之捷威名大盛

北齊書長恭與周戰

於邳山後主謂曰入陳太深失利悔無所及對曰家事親切不覺遂然帝嫌其稱家事遂忌之案邳山之戰在

河清三年後主時年九歲尚未即位何得有此問且稱家事亦何足致忌今不取

十月以魯廣達為北徐州刺史

陳書帝紀及廣達傳皆云北徐州按北齊書祖

珽傳珽保全北徐州城不陷蓋南人謂京口為南徐州故謂北為北徐州其實乃北齊之南徐州也

六年三月周叱奴太后殂帝居倚廬

隋書張衡傳云武帝居憂與左右出

獵衡露髮輿觀切諫按帝居喪有禮疑衡自叙之妄

七年三月周伊婁謙元衛聘於齊

謙傳作拓跋偉今從周書帝紀

九月齊高阿那肱將兵拒周師

北齊書云閏月己丑按是月癸丑朔無己丑又

下有庚辰蓋誤也

八年三月王瑒卒

陳書庚寅瑒卒按長曆是月已酉朔無庚寅陳書誤

十月齊主與馮淑妃獵於天池

馮淑妃傳云獵於三堆今從高阿那肱傳

十二月己未周主至晉陽

周書武帝紀丁巳大軍次并州又云己未軍次并州蓋丁

己前軍至己未帝乃至也

周賀拔伏恩

北齊書安德王延宗傳作佛恩今從周齊帝紀

九年正月周尉遲勤追齊主

北齊書勤作剛今從周書

二月周平齊得州五十郡一百六十二縣三百八十

隋書

地理志云州九十七郡一百六十縣一百六十五今從周書



十年二月馬主裴子烈

南史作馬明王今從陳書

十一年正月周主行刑經聖制

周帝紀行刑經聖制在八月按隋元巖傳樂運

之諫因巖納說得免及王軌之死巖遂廢于家今運書已有更嚴前制之誤然則行刑經在軌死前也

十二月九郡民自拔還江南

陳紀九郡作九州蓋字誤

十二年五月乙未周宣帝殂劉昉鄭譯矯詔以楊堅總

知中外兵馬事

周帝紀乙未帝不豫還宮詔堅入侍疾丁未追五王入朝己酉大漸昉譯矯詔

以堅受遺輔政是日帝崩按堅以變起倉猝故得矯命當國若自乙未至己酉凡十五日事安得不泄今從隋

紀

帝

出顏之儀為西邊郡守

北史鄭譯傳之儀與宦者謀引大將軍宇文仲輔政仲已至御

坐譯知之遽率開府楊惠及劉昉皇甫績柳裘俱入仲與之儀見譯等愕然遂巡欲出隋文因執之於是矯詔復以譯為內史上大夫明日隋文為丞相拜譯柱國府長史按之儀若爾豈復得全今從之儀傳

七月尉遲迴所統相衛等州

周書迴傳又有毛州按迴滅後隋高祖始置毛州迴

傳誤也

尉遲惇縱火棧高頴為土狗以禦之

隋書作大棧木狗今從北史

宇文忻先射觀戰者

隋書云高頴與李詢先犯觀者今從北史

十三年三月隋賀若弼為吳州總管

隋書帝紀云楚州今從弼傳

十二月突厥沙鉢略可汗攝圖立

隋突厥傳云木杆在位二十年卒佗鉢在

位十年卒按周傳魏廢帝二年三月科羅獻馬木杆猶未立建德二年佗鉢獻馬然則木杆以承聖二年立太建四年卒佗鉢以其年立十三年卒也

長城公至德元年二月以毛喜為永嘉內史

司馬中傳云右僕射

沈君理卒朝議以毛喜代之按君理卒在太建五年非後主時又毛喜傳云時山陵初畢未及踰年按高宗殂過暮乃葬而云未及踰年恐誤也

三月隋遷于新都

隋食貨志云正月帝入新宮今從帝紀

八月丁卯朔日食

隋紀作七月丁卯蓋歷差

十二月長沙王叔堅坐厭媚免官

南史云上陰令人造其厭媚又令人告之

今從陳書

二年正月隋頒新歷

隋律歷志云二月撰成奏上今從帝紀

二月突厥達頭可汗請降于隋

隋帝紀云突厥阿史那玷厥牽其屬來降按時

玷厥方疆

蓋偽降耳

帝使女學士與狎客賦詩互相贈答

平陳記云張貴妃等八人夾坐江湄

等十人預宴先命八婦人襲采牋製五言詩十客一時繼和稽緩則罰酒今從陳書南史

三年七月突厥可汗遣子庫合真入朝于隋

隋突厥傳作窟合真

今從  
帝紀

禎明元年四月突厥莫何可汗生擒阿波

隋突厥傳前云沙鉢略西

擊阿波破擒之後又云處羅侯生擒阿波長孫晟傳曰處羅侯因晟奏曰阿波為天所滅與五六千騎在山谷間伏聽詔旨當取之以獻按前云沙鉢略破擒之擒衍字耳處羅侯云當取以獻則是得否未可必隋安得豫議其死生乎今從突厥傳後

### 隋紀

高祖開皇九年正月陳呂忠肅屯岐亭

隋書作呂仲肅南史作呂肅今

從陳  
書

綴鐵鎖三條

南史作五條  
今從隋書

二月韋洸等定嶺南

隋帝紀十年八月壬申遣洸等巡撫嶺南百越皆服按陳以九年正

月亡至來年八月并閏計二十一月豈有洸氏猶不知者洸氏傳又云晉王遣陳主遺夫人書則事在九年三月前也帝紀所云蓋謂百越已服奏到朝廷之日也

四月元諧等伏誅

李德林傳云德林以梁士彥元諧頻有逆意江南抗衡上國乃著天命論

上之諧傳云平陳後數歲人告諧謀反按諧請以叔寶為內史則陳亡時猶在楊雄方用事諧欲諧去之則雄未為司空故附於此

十年十一月無錫賊帥葉略

北史楊素傳作葉皓今從隋書

十三年突厥處羅侯之子染干號突利可汗

突厥傳云沙鉢略子

今從長孫晟傳

十四年閏十月帝言劉昉為大逆鄭譯為巫蠱

盧賁傳云昉為

大逆於前譯為巫蠱於後按譯以開皇元年坐巫蠱廢昉以六年坐謀反誅賁傳誤也

十五年三月帝怒楊素為離宮壯麗封德彝言皇后至

必有恩詔

隋書北史皆曰宮成上令高頴前視奏稱頗傷綺麗大損人丁帝不悅素懼即於北門啓

獨狐皇后曰帝王凜有離宮別館今天下太平造一宮何足損費后以此理論上上乃解今從唐書

十二月敕盜邊糧一升以上皆斬

刑灋志事在十六年今從帝紀

十六年八月詔決死罪者三奏然後行刑

刑灋志在十五年今從帝

紀

十七年三月行旅晏起早宿

刑灋志作晚宿必早字誤耳

二十年四月長孫晟追突厥斬千餘級

煬帝紀曰出靈武無虜而還突

厥傳曰晉王出靈州達頭遁逃而去晟傳曰達頭與王相抗蓋達頭聞王來而遁晟將兵從別道與達頭相遇耳

史萬歲破突厥

帝紀十九年六月史萬歲破賊據本傳在今年紀誤也

九月壬子上至自仁壽宮

帝紀丁未至自仁壽宮今從太子勇傳



仁壽四年七月丁未上崩中外頗有異論

趙毅大業略記曰高祖在

仁壽宮病甚追帝侍疾而高祖美人尤嬖幸者唯陳蔡二人而已帝乃召蔡於別室既還面傷而髮亂高祖問之蔡泣曰皇太子為非禮高祖大怒齧指出血召兵部尚書柳述黃門侍郎元巖等令發詔追庶人勇即令廢立帝事迫召左僕射楊素左庶子張衡進毒藥帝簡驍健官奴三十人皆服婦人之服衣下置伏立於門巷之間以為之衛素等既入而高祖暴崩焉總通歷曰上有疾於仁壽殿與百寮辭決並握手歔歔是時唯太子及陳宣華夫人侍疾太子無禮宣華訴之帝怒曰死狗那可付後事遽令召勇楊素祕不宣乃屏左右令張衡入拉帝血濺屏風冤痛之聲聞于外崩今從隋書

乙卯發喪

大業略記曰十八日發喪杜寶大業雜記曰甲戌文帝崩卒已發喪壬午煬帝即位按長

歷是月乙未朔乙卯二十一日也  
無甲戌辛巳壬午日今從隋書

追封庶人勇為房陵王不為置嗣

大業略記云庶人勇八男亦陰加酖害恐

其為厲皆倒埋之按隋書北史皆云煬帝踐極儼常從  
行卒於道實酖之也諸弟分徙嶺表仍敕在所皆殺焉  
今從之

八月漢王諒反裴文安請直入蒲津

大業略記云司兵參軍裴文安說諒

曰今梓宮尚在仁壽宮比其徵兵動移旬月今若簡驍  
勇萬騎令文安督領不淹十五日徑像長安其在京被  
黜傳私之徒竝擢按高位付以心膂共守京城則以東  
府縣非彼之有然後大王總兵鼓行而西聲勢一接天  
下可指揮而定也諒不從大業雜記云文安又說曰先  
人有奪人之心殿下選精騎一萬徑往京師犇喪曉夜

兼行誰敢止約至京徑掩仁壽宮彼縱徵召未暇禦我  
大軍駱驛隨王而至此則次計王直資河北彼率天下  
之兵百道攻我則難為主  
人此下計也今從隋書

豆盧毓圖諒諒將往介州令毓留守

皇甫誕傳云林素將至諒屯清源以

拒之按諒屯清源時素軍已迫何暇自還襲毓今從毓傳

煬帝大業元年三月命皇甫議發民百餘萬開通濟渠

雜記作皇甫公儀又云發兵夫五十餘萬今從略記

八月行幸江都

雜記作九月今從隋帝紀及略記

御龍舟

略記云甲子進龍舟按長歷是月戊子朔無甲子

龍舟高四十五尺

略記云高五大雜記云其制度尤詳今從之

二年二月詔吏部尚書牛弘等定輿服制度

帝紀云尚書令牛弘

禮部侍郎許善心按弘未嘗為尚書令善心於帝即位之初已左遷蓋紀誤也

七月元德太子昭薨

雜記云初太子之遘疾也時與楊素同在侍宴帝既深忌於素竝起

二庖同至傳酒者不悟是藥酒錯進太子既飲三日而毒發下血二斗餘宮人聞素平常始知毒酒誤飲太子祕不敢言太子知之歎曰豈意代楊素死乎命也數日而薨後素亦竟以毒斃按它書皆無此說蓋時人見太子與素相繼薨妄有此論耳

四年正月穿永濟渠

雜記三年六月敕開永濟渠引汾水入河於汾水東北開渠合渠水

至于涿郡二千餘里通龍舟按永濟渠即今御河未嘗通汾水雜記誤也

二月遣崔君肅使西突厥

隋帝紀作崔毅今從西突厥傳

三月幸五原行宮設六合板城

雜記云帝幸啟民帳時造行城周二千步高二

十餘丈今從隋禮儀志

八月帝祠恒岳裴矩所致西域十餘國皆來助祭

裴矩傳云

三年誤也今從帝紀

十月遣薛世雄擊伊吾

世雄擊伊吾帝紀無之本傳前有從帝征吐谷渾後云歲餘以

世雄為王門大將與突厥啟民可汗擊伊吾然則似在大業六七年也按是時啟民已卒伐吐谷渾之歲伊吾

吐屯設獻地數千里恩寵甚厚  
隋何故伐之今移置獻地之前

五年五月大獵長圍亘二十里

隋帝紀作二千里  
疑二十里字誤

帝至浩豐川以橋未成斬黃亘

隋帝紀云梁浩豐御馬  
度而橋壞今從略記

六月丙辰宴高昌王麴伯雅伊吾吐屯設

略記在六月  
壬寅今從隋

紀帝

七月帝東還經大斗拔谷士卒凍死

帝紀在六月癸卯  
按西邊地雖寒不

容六月大雪凍死人畜今從略  
記略記作達十拔谷今從帝紀

六年正月有盜數十人入建國門

雜記在五年正月又  
云三百人今從隋書

三月初帝欲大營汾陽宮

張衡傳云帝幸衡宅之明年幸汾陽宮又云明年復幸汾

陽宮按本紀皆無其事恐傳誤

七年四月庚午車駕至涿郡之臨朔宮

略記中丙午幸涿郡之新宮樓

長歷是月丙辰朔無丙午今從帝紀

十二月孫安祖殺縣令亡抵竇建德

杜儒童隋季革命記云安祖以盜羊

為縣令所考今從舊唐書建德傳

八年正月

略記云癸丑帝御前殿按長歷是月辛巳朔無癸丑略記甲子多差誤今不取皆從隋書

西突厥闕達度設

隋西突厥傳作達度闕設今從裴矩傳

賜處羅號娑那可汗

唐李軌傳作曷娑那可汗今從隋書

三月錢士雄孟金義戰死

雜記作錢英孟金欽今從隋帝紀

車駕度遼

隋帝紀癸巳上御師甲子臨遼水橋戊戌麥鐵杖死甲午車駕度遼乙未大頓丙申大赦

按長歷是月庚辰朔不容有甲子又戊戌之下不容有甲午乙未丙申此必誤也今竝除之

六月來護兒破高麗復為所敗還屯海浦

北史云護破高麗斬高元

弟建武因破其郭營於城外以待諸軍今從隋書及革命記

高麗遣乙支文德詐降

革命記作尉支文德今從隋書及北史

文德復詐降宇文述等遂還

革命記云許公即至平壤城頭即樹降幡約至五日



檢錄簿籍圖書開門待命期過五日無一言許公頻催竟無報荅入十數日乃云船糧敗却迴公今更欲何待然始抗旌拒守分兵以捉險要許公知被欺即卷甲歸每日常設方陳而行四面俱時受敵傷殺既衆糧食入盡過遼水者什無二三按煬帝驕暴高麗若明言不降述等必不敢遠今從隋書

七月癸卯帝引還

雜記七月帝自涿郡還東都十一月宇文述等糧盡遁歸高麗出兵邀截

亡失蕩盡帝怒敕所司鎖將隨行無幾斬劉士龍等於軍市持赦述今從隋書

九月車駕至東都

雜記十月車駕幸涿郡徵召兵馬將遂度遼之功蓋誤今不取

十一月于仲文卒

略記于仲文以下斬于市今從隋書

九年正月靈武賊帥白瑜娑

隋書作白榆娑今從略記

二月復宇文述官爵

雜記在去年十一月今從隋書

六月楊玄感以河內主簿唐禕為懷州刺史

雜記作懷州司功書

佐今從隋書

玄感屯上春門

玄感傳云屯兵上春門又云屯兵尚書省按劉仁軌河洛記東都羅郭東而北

頭第一日上春門唐改曰上東門又尚書省在宣仁門內玄感不容至此

衛文昇率兵四萬救東都

隋書云步騎七萬按玄感眾不過十萬而下云眾寡不敵

今從雜記

文昇眾寡不敵死傷大半

雜記曰每戰刃纔接官軍皆坐地棄甲以白布裹頭聽賊

所掠前後十三戰皆不利今從文昇傳

八月令骨儀等推玄感黨與

雜記作滑儀今從隋書雜記雖玄感黨在十月疑太

晚今因誅趙元淑言之

十一月李密亡命為人所獲送東都

隋書密傳云密間行入關與玄感從

叔詢相隨匿於馮翊詢妻之舍尋為隣人所告遂捕獲因於京兆獄又云及出關外防禁漸弛又云至邯鄲密等七人皆穿牆而遁唐書雖不云囚於京兆獄亦云出關按密若自關中送高陽不當與韋福嗣同行今從賈閏甫蒲山公傳及劉仁軌河洛行年記

密至石梁驛穿牆而逸

河洛記在左梁驛今從蒲山公傳

十二月吐萬緒魚俱羅討劉元進請待來春

帝紀云緒俱羅連年

不能克按緒請待來春而王世充十年又擊孟讓然則元進敗止在今年冬春之交矣元進退據建安而得拒世充於江上者蓋復來也

王世充阮降賊三萬餘人

略記阮其衆二十餘萬於黃亭澗澗長數里深闊數丈積

尸與之乎雜記世充貪而無信利在子資財竝阮所首八千餘人於黃山之下今從隋書

十年春

雜記是年正月又以許公宇文述為元帥將兵十六萬刻到鴨綠水乙支文德遣行人偽請降

以緩我師又未與述相見以觀我軍形執述與之歡飲良久乃去停五日王師食盡燒甲札食之病不能興文德乃縱兵大戰敗績死者十餘萬此蓋序八年事誤在此耳

二月唐弼立李弘之為天子

隋帝紀作李弘今從唐書薛舉傳

五月延安賊劉迦論反

唐書作安定人按安定去上郡太遠今從隋書

十二月盧明月軍祝阿

唐秦叔寶傳作下邳今從隋書

十一年三月高德儒見孔雀奏以為鸞

雜記云五年二月馬德儒奏孔

雀為鸞今年月及姓皆從略記并溫大雅創業起居注

四月以李淵為山西河東慰撫大使

創業注云帝自衛尉少卿轉右驍衛

將軍奉詔為太原道安撫大使即隋大業十二年煬帝幸樓煩時也按十二年帝未嘗幸樓煩今從高祖實錄

在幸汾陽宮時

八月帝巡北塞

雜記六月突厥賊入嵐城鎮抄掠遣范安貴討擊之王師敗績安貴死百司震

懼七月帝幸鴈門先至天池值雨山谷泥深二尺從官狼狽帳幕多不至一夜竝露坐雨中至曉多死宮人無

食貸精於衛士今從隋書

十月壬戌帝至東都

略記九月辛未入東都今從隋帝紀

十二年五月帝於景華宮求螢火得數斛夜放之

貞觀

政要貞觀八年上謂侍臣曰人君之言不可容易隋煬帝幸甘泉宮恠無螢火敕云捉取螢火於宮照夜所司遽遣數千人採拾進五百輦於宮側小事尚爾況其大乎今從隋書

十月李密之亡抵郝孝德

韓昱壺關錄曰大業十一年正月厯亭鎮將王該認形狀

獲李密送宇文述密伴患足疾防守者一日不行一二十里忽至一澗水深岸險密跛足寅緣伴足蹶返撲而墜乃至良久狀若未蘇防守者又無計下取之遂以手中槍戟引之密以手援戟伴作失勢推戟向水守者以危岸手探不住遂即放却密即得鏑獨守者二人俱斃遂投郝孝德於平原按密楊玄感之黨前已詐亡防者豈得不加械繫怠慢如此今不取

韋城翟讓同郡單雄信

唐書云雄信曹州人今從河洛記

李密因王伯當見翟讓

隋唐書皆云密歸翟讓其中有知密是玄感亡將潛勸讓害之

密懼因王伯當以策干讓始敬焉按密既亡歸羣盜必不隱其姓名誰不知是玄感亡將讓得之當用以敵隋何惡於密而害之今不取革命記云密投賊帥郝孝德說之曰若能用密之策河朔可指揮而定孝德曰本緣

飢荒求活性命何敢別圖國家若知公在此孝德死亡無日翟讓等徒衆絕多請將兵送公於彼是日孝德以馬一匹自送至河執袂飲酒而別軍中慕從者亦數十人仍遣兵馬將送密於翟讓今從隋書

密說讓先取滎陽休兵館穀

革命記密說讓曰洛口倉米逾巨億請公發一札之

令使密奉之告諸道英雄就倉喫米必當雲合響應受命於公然後稱帝號以定中原云云讓曰就倉食米實是上計自顧庸賤寧敢別創餘心必如此謀願奉公為主密懷懼改容而拜讓亦拜於是言宴盡歡各恨相知之晚即日讓作書與密散告諸處賊頭並剋期定日令總會洛口倉食米今從隋書

操師乞自稱元興王建元始興

隋帝紀作操天成按唐高祖實錄林士弘傳大

業未與其鄉人操師乞起為羣盜師乞僭號建元為天

成攻陷豫章郡入據之唐書士弘傳云操乞師自號元



興王皆無操天成名此賊本一人而隋唐二史各有名號年紀今參取之

十二月林士弘稱帝國號楚建元太平

唐高祖實錄士弘自稱南越王

尋僭號建元延康唐書林士弘傳操乞師攻陷豫章郡而據之以士弘為大將軍乞師既死士弘代董其衆復與劉子翊大戰於彭蠡湖隋師敗績子翊死之士弘大振兵至十餘萬十三年徙據虔州稱帝其國號年名與此同今從隋書

李淵為太原留守討甄翟兒破之

新舊唐書本紀皆云十三年拜太原留守

新書仍云擊高陽歷山飛賊甄翟兒於西河破之今從隋帝紀

楊義臣破高士達斬之竇建德收散兵軍復大振

革命記曰

高士達高德政與宗族鳩集離散得五萬人捺漕於四  
根柳樹入高難泊中德政自號東海公以建德為長史  
俄而德政病死即有高攢脫繼立為東海公建德任依  
舊任攢脫領兵劫抄至晏城府為城中兵所射而死賊  
之異姓皆欲建德為主高氏一族不欲更立別人遂分  
為兩軍各相猜貳然高氏兵精強建德恐被屠乃詐分  
為官軍告高氏併力共擊之高氏無疑即合軍共鬪兵  
刃纔交建德自後擊之高氏兵大亂建德兩軍擁掠遣  
坐簡其驍勇及頭首千餘人殺之遂總統其眾建德自  
號長樂王寇抄州縣即大業十二年二月也今從隋唐  
書

恭帝義寧元年正月杜伏威大破陳稜

隋陳稜傳云往  
往克捷唐杜伏

威傳云稜僅以身免蓋稜先破李子  
通等後為伏威所敗也今從唐書

欽定四庫全書

卷八

資治通鑑考異

十六

竇建德稱長樂王改元丁丑

許敬宗唐太宗實錄舊唐帝紀皆云武德元年二月

建德稱長樂王按建德改元丁丑即是今歲今從隋帝紀及建德傳

二月劉武周殺王仁恭自稱太守

創業注云二月己丑馬邑軍人劉武周殺

太守王仁恭據其郡自稱天子國號定楊按唐書武周據汾陽宮乃僭號於時未也

越王侗討李密約十一日會倉城南

蒲山公傳云剋取二十一日會戰河

洛記云取其月十二日會戰按下有庚子則非二十一日也當是十一日

李密號魏公稱元年

壺關錄云王伯當令密於西垣校射書王字於棚上如錢約中者為

主其次以近遠為拜官高下使賈雄執箭仰天而誓密正中字心遂奉以為主其說鄙陋今不取河洛記云改

大業十三年為永平元年  
今從蒲山公傳及隋唐書

密拜翟讓為上柱國司徒封東郡公

河洛記云鄧公蓋後來進封耳今從

蒲山公傳  
及隋唐書

羣盜皆歸密衆至數十萬

略記云二月丙辰密遣其將夜襲倉城二府兵擊退之已

未又悉衆來攻而府兵敗遂入據倉然二府將士猶各固小倉城二十餘日不下既而外救不至食又盡城乃陷沒死者大半於是鞏縣長柴孝和監察御史鄭頴等舉縣降賊密開倉招納降者日數百千人於是趙魏以南江淮以北莫不歸附自是賊徒滋蔓矣壬子使劉長恭房劓等統兵東討大敗戊午還都王愬撫不責也於是發教募士庶商旅奴等分置營壁各立將帥統領而固守其諸里居民皆移入三城之內於省寺府舍安置

焉又使宋遵貴將兵鎮陝縣太原倉雜記密稱魏公改  
年于時倉猶自固守既而密遣翟讓將兵夜襲倉城官  
軍擊退之明日又引衆攻倉連戰三日陷外城官軍猶  
捉子城月餘外援不至城盡陷沒死者十六七按二月  
壬午朔無丙辰  
等日今從隋書

密築洛口城周四十里

壺關錄云周四十里今從隋書

三月突厥立劉武周為定楊可汗

新舊唐書武周皆無國號唯創業起居注

云國號  
定楊

四月薛舉與其子仁果劫郝瑗發兵

唐高祖實錄先作仁果後作仁果新

舊高祖太宗紀薛舉傳柳芳唐歷柳宗元集皆作仁果  
太宗實錄吳兢太宗勲史革命記焦路唐朝年代記陳

嶽唐統紀皆作仁果今醴泉昭陵前有石馬六匹其一銘曰白蹄烏平薛仁果時所乘此最可據今從之

李密以孟讓為總管

河洛記作孟達今從隋書

癸巳密襲回洛東倉破之攻偃師金墉不克乙未還洛

口略記三月辛未密遣孟讓將二千餘人夜入都郭燒

豐都市北曉而去癸未密襲據都倉乙亥密部衆入自上春門於宣仁門東街立柵而住丙寅燒上春門及街南北里門樓火接宣仁門因逼門為陳與城上弓矢相接而退還倉雜記密遣革謙將兵燒豐都市三月越王侗教募人捉宮城守固官賞有差撤天津等諸橋運回洛倉米入城四月密攻偃師圍金墉東都兵出密還洛口五月裴仁基翻虎牢入賊自滎陽以東至陳譙下邳彭城梁郡皆屬密賊衆逾盛并家口百萬蒲山公傳三月乙亥密率衆入自上東門攻宣仁門不克丙寅燒

上東門而退此三書月日交  
錯皆不可憑今從隋唐書

趙陀降密

隋書作趙佗今  
從蒲山公傳

煬帝以李淵王仁恭不能禦寇遣使執詣江都繼遣使

馳驛赦之

創業注曰隋主遣司直姓名馳驛繫帝而斬  
仁恭帝自以姓名著於圖錄太原王氣所在

恐被猜忌因而禍及頗有所悔時皇太子在河東獨有  
秦王侍側耳語謂王曰隋歷將盡吾家繼膺符命不早  
起兵者顧爾兄弟未集耳今遭爰里之厄爾昆季須會  
盟津之師不可從吾同受孥戮家破身亡為英雄笑王  
泣而啟帝曰芒碭山澤是處容人請同漢祖以觀時變  
帝曰今遇時來逢茲錮繫雖覩機變何能為也然天命  
有在吾應會昌未必不以此相啟今吾激勵謹當敬天  
之誠以卜興亡自天祐吾彼焉能害天必亡我何所逃

刑乃後數日果有詔使馳驛而至釋淵而免仁恭各依舊檢校所部按煬帝若有詔斬仁恭則比後使之至仁恭已死矣又高祖身為留守且被禁繫亡去何之恐此亦非太宗之謀也今皆不取

五月丁丑李密與隋軍戰大敗犇洛口

略記云四月戊申段達等帥關

內兵陳於倉西倉南密出軍拒戰大破凶醜密還固倉五月丁丑達等又出兵陳於倉西倉北密又來拒大破之密犇洛口按隋書北史新舊唐書皆云密為流矢所中卧營中東都出兵擊之密衆大潰棄回洛倉犇洛口俱無月日河洛記云密軍失利歸於鞏縣東都復得回洛倉蒲山公傳云五月二十八日越王夜出師使段達等大戰於倉西北密軍敗績歸於鞏縣亦不云密連月再敗也戊申四月二十八日丁丑五月二十八日蓋趙毅承蒲山公傳誤以密一敗分為二事也



楊德方死

壺關錄作王德仁今從河洛記

卷八

密以鄭乾象為右司馬

隋唐書皆作虔象唯壺關錄作乾象云密殺其兄乾覆乾覆之

子會通後從盛彥師殺密今從之

六月劉文靜勸李淵結突厥

創業注云突厥去覘人來報文武入賀帝曰且勿相

賀當為諸君召而使之即自手與突厥書蓋溫大雅欲歸功高祖耳今從唐書劉文靜傳

淵自為手啟卑辭厚禮遺可汗

創業注云仍命封題署云名啓所司請改啟為

書帝不許按太宗云太上皇稱臣於突厥蓋謂此時但溫大雅諱之耳

李淵使建成世民將兵擊西河

創業注云命大郎二郎率眾討西河高祖太宗

實錄但云命太宗徇西河蓋史官沒建成之名耳唐殷嶠傳從隱太子攻西河今從創業注

七月煬帝遣王世充等赴東都討李密

雜記四月世充率淮南兵萬人

援東都世充行至彭城懼密衆之盛自以兵少不敵乃間行自黎陽濟河而至七月世充率留守兵二萬擊密無功今從略記蒲山公傳

劉文靜至突厥與可汗為約

唐劉文靜傳曰始畢曰唐公起事今欲何為文靜曰

皇帝廢冢嫡傳位後主致斯禍亂唐公國之懿戚不忍坐觀成敗故起義軍欲黜不當立者創業起居注先已再遣使至突厥不容今日始畢方有此問今不取

淵以書招李密

壺關錄云高祖屯壽陽遣右衛將軍張仁則齎書招李密蒲山公傳密答書曰

欽定四庫全書

資治通鑑考異

主

使至辱今月十九日書按長歷是月己酉朔十九日丁卯不應己已還至霍邑又發書日不應猶在壽陽今皆取不

淵將北還世民諫而止乃與建成分道追軍

創業注帝集文武官

人及大郎二郎等而謂之曰以天贊我而言應無此執以人事見機而發無有不為借遣吾當突厥武周之地何有不來之理諸公謂云何議者以老生屈突通相去不遙李密譎誑姦謀難測突厥見利而行武周事胡者也太原一都之會義兵家屬在焉愚夫所慮伏聽教旨唐公顧謂大郎二郎曰爾輩何如對曰武周位極而志滿突厥少信而貪利外雖相附內實相猜突厥必欲來利太原寧肯近忘馬邑武周悉其此勢未必同謀同志老生突厥奔競來拒進闕圖南退窮自北還無所入往無所之畏溺先沈近於斯矣今禾菽被野人馬無憂坐

即有糧行即得衆李密戀於倉粟未遑遠略老生輕躁破之不疑定業取威在茲一決諸人保家愛命言不可聽雨罷進軍若不殺老生而取霍邑兒等敢以死謝唐公喜曰爾謀得之吾其決矣三占從二何藉輿言懦夫之徒幾敗乃公事耳太宗實錄盡以爲太宗之策無建成名益沒之耳據建成同追左軍則是建成意亦不欲還也今從創業注

薛舉稱秦帝

唐高祖實錄武德元年四月辛卯舉稱尊號按今冬舉敗問褚良天子有降事否是

則已稱尊號也今從唐書舉傳

竇建德破世雄

革命記帝以李密在洛口征遼回日令右翊衛將軍薛世雄於留鎮兵內簡練

精銳及幽易驍勇討密經過之處若有草竊隨便誅翦仍令王世充等諸軍竝取世雄處分世雄乃自領精兵

六萬四月末至河間郡城下作營州縣皆備牛酒軍糧以待薛將軍時建德以無糧食兵士先皆分散餘軍不滿千人在武強縣境收麥充食聞世雄兵至河間惶懼無計問一女巫欲走避之如何巫云不免問欲首如何巫云亦不吉問欲掩其不備擊之如何巫云今夜未明到大吉卜時日已午卜處去河間一百四十里建德簡精兵二百八十人先行餘勒續發建德與衆決云夜到即打明即降之吉凶之事在此舉耳遂行去世雄營二里天已屬明又聞吹角聲擬發建德惶惑欲降須臾大霧忽起建德曰此天助我也遂引兵入營攻之兵遂大亂世雄左右先已裝束擬發世雄遂得上馬奔走仍中數槍僅而獲免幽易之士竝不欲作留鎮兵先無鬪意既不知賊多少悉棄甲奔亡遂使山東賊勢轉盛李密先招慰河北州縣多悉從之世雄慙憤而卒唐竇建德傳云七月世雄討之建德帥敢死士千人襲之世雄以數百騎遁去今從隋薛世雄傳以建德傳革命記參

之

九月李密使徐世勣襲取黎陽倉

河洛記今年四月祖君彥檄云又得回洛

復取黎陽天下之倉盡非隋有而九月魏徵啟方勸取黎陽倉蓋君彥為檄欲虛張聲勢非事實也

開倉恣民就食得勝兵二十餘萬

唐李勣傳勣初得黎陽倉就倉者數十萬

人魏徵高季輔杜正倫郭孝恪皆客游其所一見於衆人中即加禮敬引之卧内談讌忘倦按徵為元寶藏作啓方謀取黎陽倉高季輔兄為汲令杜正倫為羽騎都尉郭孝恪先在密所足知此事為虛今所不取

屈突通使桑顯和襲王長諧營長諧等戰不利

創業注云桑顯

和率驍果精兵數千人夜馳掩襲長諧等軍營諧及孫華等奉教備預故竝覺之伺和赴營設伏分擊應時摧

散唐高祖本紀云義師不利太宗以遊騎數百掩其後顯和潰散按太宗時未過河西今從高祖實錄及唐史太宗傳

李淵圍河東

創業注戊午唐公親率諸軍圍河東郡屈突通不敢出開門自守城甚高峻不易可

攻唐公觀義士等志試遣登之南面千餘人應時而上時值雨甚公命旋師軍人時速上城遂不時速下公曰屈突宿衛舊人解安陣隊野戰非其所長嬰城善為捍禦我師常勝入必輕之驍銳先登恐無還路今且示威而已未是攻城之時殺人得城如何所用乃命還唐高祖實錄云驍勇千餘人已登其南城高祖在東原不見會暴雨高祖鳴角收衆由是不克溫大雅因為虛美耳今不取

已未越王侗使劉長恭等合王世充兵擊李密

略記作  
乙丑河

洛記作十二日蒲山公傳九月十一日師出東都按  
長厯是月己酉朔乙丑十七日也今從蒲山公傳

煬帝詔諸軍皆受世充節度

略記云世充擊密罔不摧  
破露布相續而來百姓忻

忻歡詠於道蒲山公傳云自秋徂冬凡經三十餘戰世  
充多敗績河洛記云四十餘戰世充無功三書相違莫  
知孰是今皆不取唯  
勝負有顯狀者存之

張季珣為李密所殺

隋書季珣傳云密攻之經三年遂  
為所陷又云密壯而釋之翟讓從

求金不得遂殺之河洛記曰自三月至九月不下後為  
糧盡水竭乃被摧陷生獲珣於牙門遣人宣之以降為  
度珣更張目極罵不肯低屈遂殺之按密明年已降唐  
安得三年攻守箕山之事今參取二書去其抵牾者而  
已



屈突通引兵趣長安

唐書通傳云將自武關趣藍田赴長安疑其太迂今但云趣長安

段綸娶李淵女

唐太宗實錄云隱太子以琅邪長公主妻之劉子玄唐高宗實錄及新唐書皆

云高密大長公主

適段綸蓋改封

房玄齡謁李世民於軍門

舊唐書玄齡傳云溫彥博又薦焉按彥博時在羅藝所今

不取

李淵命劉弘基殷開山西略扶風屯長安故城

創業注云敦煌

公自涇陽趨司竹劉弘基開山屯長安故城今從唐書弘基傳

十一月雷永吉先登

唐高祖實錄作雷紹今從創業注

衛文昇已卒李淵斬陰世師等

隋書北史衛玄傳皆曰城陷歸于家義寧中卒

按文昇與二人俱為留守官不容獨免今從唐本紀

李靖素與淵有隙

柳芳唐歷及唐書靖傳云高祖擊突厥於塞外靖察高祖知有四方之志

因自鎖上變將詣江都至長安道塞不通而止按太宗謀起兵高祖尚未知知之猶不從當擊突厥之時未有異志靖何從察知之又上變當乘驛取疾何為自鎖也今依靖行狀云昔在隋朝曾經忤旨及茲城陷高祖追責舊言公忼慨直論特蒙宥釋但行狀題云魏徵撰非也按徵以貞觀十七年卒靖二十三年乃卒蓋後人為之託徵名又叙靖事極怪誕無取唯此可為據耳

丙辰王世充戰敗戊午李密殺翟讓

前已有丙辰戊午欲各叙西京東都

事使不相  
亂故重出

翟讓兄弘

河洛記作洪今  
從蒲山公傳

密與讓弘等共坐單雄信等立侍

河洛記云密讓讓兄  
子摩侯王儒信同榻

而坐今從  
蒲山公傳

丙寅置丞相府官屬

唐帝紀在十二月  
癸未今從創業注

十二月屈突通降

革命記高祖令諸將擊通通走出潼  
關仍令通子壽隨軍喚父至稠桑追

及之壽告通云天下今既喪亡相王舉義兵平定禍亂  
大人須轉禍為福以自保全單馬輕身將欲何往通叱  
壽云此賊何由可耐引弓射之壽招喚通兵士竝悉放  
仗來降壽乃馳走抱通請大人屈節歸義通遂回首東

南兩淚號哭口稱至尊臣力屈以至於此非臣敢虧名節違背國恩然始收淚赴軍以見唐王今從唐書唐裴矩傳屈突通敗問至江都煬帝問矩方略矩曰太原有變京畿不靜遙為處分恐失事機唯鑾輿早還方可平定按隋失天下皆因矩諂諛所至豈敢輒勸帝西還蓋矩經事唐朝其子孫及史管附益此語欲蓋其惡耳今取不

王世充屢與李密戰不勝

蒲山公傳云自洛北敗至此七十餘戰河洛記云四十餘

戰再三失利今但云屢與密戰

李淵遣詹俊李仲哀徇巴蜀

創業注云十一月甲子遣使慰諭巴蜀實錄在十二

月甲辰唐歷在十二月丙午未知創業注所云者即俊等邪為別使也今從實錄

資治通鑑考異卷八